

LA CARTA DEL APOSTOL SAN PABLO A LOS ROMANOS

1 ¹Wejr Pabluqui ančhucaquin tii cartal cjiŕŕcučha. Jesucristuž mantitacama okiñ žoñtčha. Yooz Ejpmi wejr kjawžcu apóstol puestuquin utchičha, liwriiñi Yooz taku parlajo.

²Tuquitanpacha Yoozqui tsjii liwriiñi žoñi cuchanžquiz compromitchičha. Jalla nii compromittauqui Yooz cuntiquiztan chiiñi profetanacuqui mazinchičha zuma Yooz tawki libruquiz. ³Nii liwriiñi žoñiqui Jesucristo Jiliričha. Yooz Majchčha niiqui. Jesucristuqui žoñi cjicanaqui Davidž majch maatinacuiztan tjonñitačha. ⁴Nižaza Jesucristuqui ticziquiztan jacatatchičha; nižaza zuma Yooz Espirituchizza. Jalla nii kjanapacha tjeeža, niičha walja azziz Yooz Majchqui, nii. Jesucristo Yooz Majchčha učhum Jiliriui. ⁵Jesucristuž cjen wejrqui zuma Yooz kamaña tanzinčha. Nižaza Jesucristuž cjen Yooz Ejpmi wejr apóstol puestuquiz utchičha, tjapa wajtchiz žoñinaca Jesucristužquin kuzziz cjeyajo, nižaza niizquiz cazajo. Jalla nuž apóstol kamañquiz kamcan, Jesucristužtajapa langznučha. ⁶Ančhuc zakaz Jesucristužquiz kuzziz cjissinčhucčha. Yooz Epiž ančhuca kuzquiz kjawžtan Jesucristuž partiquiz cjissinčhucčha.

⁷Wejrqui tjapa ančhucaquin cjiŕŕcučha, Roma wajtquin žejlñi žoñinacčhucčha. Yooz k'ayi žoñinacaž cjen, Yoozqui ančhucaquiz kjawzičha, Yooz zuma kamañchiz cjeyajo. Učhum Yooz Ejpmi, nižaza Jesucristo Jiliriui ančhucaquiz zuma yanapt'ila; nižaza cuntintu kuzziz cjiskatla.

PABLO ROMA WAJTQUIN TJONZ PECČHA

⁸Jaziqui ančhucaž zuma kamtiquiztan Yooz Ejpmi ancha gracias cjican chiyučha. Tjapa wajtchiz žoñinacaqui ančhuc puntu chiičha, ančhucqui ancha Jesucristužquin kuzzizza, nii. Jesucristuž cjen Yoozquin gracias cjican chiyučha. ⁹Wejrqui tjapa kuz Yooz sirwučha, Yooz Majch liwriiñi puntu parlican. Jaziqui Yooz zizza, oracionžtan ančhucaquiz tirapan yanapučha, nii. ¹⁰Nižaza Yoozquin mayizučha. Yooz munan, ultimu ančhucaquin jaknužquiztanami tjonzquiz atučhani. Ažka ančhucaquin tjonzquiz pecatučha. ¹¹Ančhucatan ancha zalz pecučha, Yooz kamañquiz ančhucaquiz tsjan zuma kami yanapzjapa, nižaza Yooz tjup kuzzizpan cjiñi yanapzjapa. ¹²Ančhucmi wejrmi Jesucristužquinkaz kuzzizčhumčha. Jalla nižtiquiztan

zalžcu porapat chiižinascu, Yoozquin juc'ant kuzziz cjesača učumqui.

¹³Jilanaca, cullaquinaca, ančhucaquiz zizkat pecuča, kjaž wiltami wejrqui ančhucaquin tjonz pecatuča. Pero tii orcama ana atchinča. Ančhucaquin tjonz pecatuča, Rom wajtquiz zakaz Yooztajapa obranaca payi. Rom wajtquizimi, nižaza yekja watjanacquizimi Jesucristužtajapa langz pecuča, žoñinaca niižquin kuzziz cjeýajo. ¹⁴Wejrqui liwriiñi Jesucristuž puntu parlistanča, k'ar žoñinacžquizimi campuquiz žejlñi žoñinacžquizimi, zizñi žoñinacžquizimi, ana zizñi žoñinacžquizimi. Jalla tjapa žoñinacžquizimi liwriiñi Jesucristuž puntu parlistanča. ¹⁵Jalla nižtiquiztan wejrqui ančhucaquiz zakaz nii puntu parliz anchal pecuča.

ANCHA AZZIZZA LIWRIIÑI TAKUQUI

¹⁶Jakziltat liwriiñi Yooz taku catokačhaj niiqui, liwriita cjequiča. Tuquiqui judío žoñinacžquiz nii liwriiz puntu parlitatača. Nekztan yekja wajtchiz žoñinacžquiz parlitazakaztača. Jakziltat nii liwriiz puntu catokačhaja, jalla niiqui liwriitaž cjequiča. Nižta azzizza liwriiñi Yooz takuqui. Jalla nižtiquiztan nii Yooz taku parlizjapa anal azuča; nii ancha zuma taku parlizjapa ancha jutztaznuča. ¹⁷Liwriiñi takuqui tuž cjiča; Yoozqui ancha zumača; nižaza žoñinacžquiz nižta zuma nižaza ana ujchiz cjiskatasacha. Jalla nuž cjiča nii liwriiñi Yooz takuqui. Jaknuž žoñinaca Yooz yujcquiz ana ujchiz, nižaza zuma cjechaja, jalla nii zizkatuča, nii liwriiñi taku chiican. Jesucristužquiz kuzziz cjen, jalla nii

alajakaz Yooz yujcquiz ana ujchiz, nižaza zuma kuzziz cjesača. Cjijrta Yooz takuqui tuž cjiča: “Jakziltat Yoozquin kuzziz cjechaja, jalla niiča Yooz yujcquiz ana ujchizqui, nižaza zuma kuzzizqui. Nekztan Yooztan wiñaya kamaquiča”.

YOOZ JAYTIŽCU ŽOÑINACAQUI UJPAN PAAČHA

¹⁸Arapachquiztan Yooz casticuqui tjonča tjapa ana Yooz kuzcama kamñinacž quintrá, nižaza anawali paañinacž quintrá. Jalla nii anazum kamañchiz žoñinacaqui anawali paaznacapan pecča, Yooz zuma kamaña anaž importiča. Nekztan Yooz kuzcama ana kamča. Yooz puntu werara zizawc cjen, atajča. ¹⁹Pero ninacž kuzquiz Yooz puntu zizasača. Yoozqui žoñinacžquiz kjanapacha tjeeziča, niž puntu. ²⁰Ana Yooz cheržcumi tii mundo paatiquiztanpacha Yooz puntu zizta cjesača. Niiž paatanaca cheržcu, tjapa žoñinacaqui Yooz puntu zizasača, Yoozqui wiñaya azzizza, nižaza werar Yoozpankazza, tii mundo paachi Yoozqui. Jalla nii kjana zizta cjesača. Jalla nižtiquiztan Yooz kuzcama ana kamcanaqui anazuma kamañchiz žoñinacaqui ana razunchizza. ²¹Žoñinacaqui Yooz puntu persun kuznacquiz zizza. Jalla nuž zizcumi, Yooz ana rispitiča, nižaza ana čhjulquiztanami “Gracias, wejt Yooz” cjican chiiča. Nekztan žoñinacaqui ina kaz pinsitanacchiz cjissiča. Nižaza ninacž chojru kuzziz cjen ana wali zumchiquiztakaz kamča. ²²Žoñinacaqui “Wejrnacča ziziñtqui” cjicanami, zumzužtakaz cjissiča. ²³Ancha zumapankazza Yoozqui. Pero žoñinacaqui nii wiñaya žejtñi Yoozquiz rispitz jaytichiča. Nekztan

žoñinacaqui žoñiž paata yoozquizkaz rispitiñi cjiñiŝiŝa. Nii žoñiž paata yooznacaqui ticzñi curpuchiz žoñinacž irata paataŝa, nižaza wežlanacž irata paataŝa, nižaza pajkpic kojchchiz animalanacž irata paataŝa, nižaza zkoranacž irata paataŝa. Jalla nižta paatanacquiz rispitiŝa.

²⁴ Jalla nižtiquiztan Yooz Ejpmqui ninacžquiz jaytichiŝa. Nekztan ninacž anazuma pecñi kuzcama čjul ujmi paañiŝa. Žoñinacpora azzucanaca paachiŝa. ²⁵ Ninacaqui Yooz puntuquiztan werar razunanaca criichi ecchiŝa. Nekztan toscar razunanaca criichiŝa. Jalla nekztan ninacaqui Yoozquin ana rispitiŝiŝa. Yooziž paata obranacquizkaz rispitiŝiŝa, nižaza sirwichiŝa. Pero Yoozqui tjappacha paachiŝa. Jalla nii tjapa paañi Yoozqui wiñaya honorchizza. Jalla nužoj cjiŝa. Amén.

²⁶ Jalla nižta anawali kuzziz cjen Yoozqui ninaca jaytichiŝa, ninacaž anazum kuzcama azzucanaca paajo. Jalla nuž azzucanaca paacan maatakanacaqui porapat želassiŝa, jaknužt lucutiñi želas, jalla nižta.

²⁷ Luctakanacaqui nižaza porapat ana wali želassiŝa, jaknužt lucutiñi želas, jalla nižta. Ninacpora ancha peccu, azzuca ujnaca paachiŝa. Ancha akñi ujnacquiz tjojtsiŝa. Jalla nižtiquiztan ninacž persun curpuquizpacha casticu sufriŝa, nii ana wali paatiquiztan. Nižaza nižta sufris waquiziŝa ninacaqui.

²⁸ Werar Yooz zizzucataŝa, pero ninacaqui Yooz ana pajz pecatŝa. Jalla nižtiquiztan Yoozqui ninaca jaytichiŝa, ninaca ana zuma pinsiñi kuzziz cjisjapa, nižaza ana zuma cjujchi kamañchiz cjisjapa. ²⁹ Ninacž kuzquiz walja tjapaman ana zumanaca želatŝa, chjijipacha. Jalla tižta

ana zumanaca želatŝa; ana Yooz kuzcama kamz, adulteriuquiz ojklaz, žoñž quintra ana wali paaz, yekja žoñžquiztan zmaz, nižaza tjapa ana walimi paaz pecñi kuz želatŝa. Nižaza ninacž kuznaca tižtaŝa: iñiziñi kuz, žoñi coñi kuz, žoñžtan quija ojklaz kuz, incallñi kuz, ana wal paaz pecñi kuz, nižaza ana wal quintu joojooñi kuz. Jalla nižta anawali kuzziz žoñi žejlŝa. ³⁰ Ninacaqui žoñž quintra chiiñinacaŝa. Yooz quintra chjaawjkatñiŝa. Nižaza žoñi iñarñiŝa, nižaza mitarazi kuzzizza, persunpacha honora waytiŝiŝa. Nižaza ana zuma paazjapa tantiñiŝa, nižaza maa ejp ana cazñiŝa. ³¹ Nižaza Yooz puntu ana intintiz pecñiŝa, nižaza chiižcupacha niiž taku ana cumpliñiŝa. Nižaza ana jec žoñžtanami munaziñiŝa. Nižaza ana pertunñiŝa. Nižaza ana jec žoñžquizimi okzñi kuzzizza. ³² Yoozqui mantichiŝa, jalla nižta žoñinacaqui ticzpan waquiziŝa. Jalla nuž Yooz mantita zizcumipacha, nii ana wali žoñinacaqui nižta ana wali paazkaz pecñiŝa, nižaza yekjaž nižta ana wali paanami, “Walikazza” cjiñiŝa.

YOOZZA LIJITUMA PJALZÑIQUI

2 ¹ Jakzilta žoñit tsjii uj paachi žoñžquiztan “Yooz nii casticla” cjiŝan chiiŝhaja, jalla nii žoñiqui ana nižta ujpacha paaz waquiziŝa. Jalla nižta ujpacha paaquizñiŝa, persun casticu chiiŝa. Nižaza Yooz yujcquiziqui anaž razunchiz cjesaŝa niiž persun paata ujqiztan. ² Yoozqui uj paañinaca lijituma pjalnaquiča, casticzjapa. Jalla nii učum zizza. ³ Jequit yekja uj paañi žoñž quintra chiiŝhaja, nižaza nižta ujkazak persuna paaŝhaja, jalla niiqui anapanž atipasaŝa Yoozquiztan. Panž castictazakaz cjequiča. Uj

paažcu, anapan pinsa, “Ana Yooziž casticta cjeeka” cjican. ⁴Jalla nižta pinsiñi žoñinacaqui Yooz puntu ana zuma intintiča. Yoozqui ancha zumača, nižaza tsjan juc'anti okzñi kuzzizza, nižaza tsjan juc'anti pasinsis kuzzizza. Jalla nii werar razunača. Pero jalla nižta kuzziz cjen, Yoozqui žoñinacžquiz persun uj sint'iskatz pecča. Nuž sint'iskatzcu ujnaca paazqui eca. Jalla nuž pecča Yoozqui. Jalla nii zizza ančhuc, čana jaa? ⁵Ančhucqui ana persun uj sint'iñiž cjen, nižaza chojru kuzziz cjen, juc'anti castictaž cjequiča Yooziž ultimu pjalz tjuñquiziqui. Jalla nii tjuñquiziqui Yoozqui žoñinacž paata ujnaca tjeeznaquiča; nekztan ultimuz casticaquiča. ⁶Jalla nii tjuñquiziqui Yoozqui tjapa žoñinaca pjalznaquiča ninacaž paatiquiztan jama. ⁷Jequit pasinsis kuzziz zuma kamañchiz kamčhaja, jalla ninacaqui Yooztan wiñaya kamaquiča. Jalla nii zuma kamñinacaqui Yooziž tjaata honorchiz cjis pecča, nižaza Yooziž rispitta cjis pecča, nižaza Yooztan wiñaya kamz pecča. ⁸Pero yekjapanacaqui persun kuzcamakaz kamz pecča, werar Yooz kamaña anaž pecča. Anawalinacž mantuquizpanž žejlča. Jalla ninacž quintra Yoozqui juc'anti žawjžcu casticaquiča. ⁹Tjapa anawali paañinacžtami sufris želaquiča, nižaza wali llaqui želaquiča. Anawali paañi judfo žoñinacaqui juc'anti sufraquiča. Pero tjapa anawali paañi žoñinacaqui zakaz sufraquiča, infiernuquinaqui. ¹⁰Tjapa zuma kamñinacazti Yooziž tjaata honorchiz cjequiča, nižaza Yooziž rispittaž cjequiča, nižaza llan kuzziz cuntintu cjequiča. Nii zuma kamñi judfo žoñinacaqui juc'ant waliž cjequiča. Pero tjapa zuma kamñi

žoñinacaqui zakaz waliž cjequiča, arajpachquinaqui.

¹¹Yoozqui žoñinaca ana illillžcu litituma pjalznaquiča. ¹²Yekjapanacaqui Moisés lii ana zizza. Jalla nižtiquiztan Yoozqui nii lii jaru ana casticaquiča; persun uj paatiquiztanjama casticaquiča. Yekjapanacaqui Moisés lii zizza. Jalla nižtiquiztan Yoozqui nii lii ana cumplitiquiztan jama casticaquiča. ¹³Jakzilta žoñinacat Moisés lii nonžcu, ana nii lii jaru kamčhaja, jalla niiqui Yooz yujcquiziqui tira ujchizza. Pero jakzilta žoñinacat Moisés lii cazza, jalla niiqui Yooz yujcquiziqui ana ujchizza. ¹⁴Ana judfo žoñinacaqui Moisés lii ana zizza. Jalla nuž ana zizcumi, ninacpacha persun kuzquiz zuma paaz zint'asača, jaknužt Moisés lii zuma paaz mantičhaja, jalla nuž. Nekztan nii kuzquiz zint'ita jaru zuma kamcan, ninacžtaqui liižtakazza nii kuzquiz zint'itaqui. ¹⁵Jalla nuž zuma kamcan kjanapacha tjeeža, Yoozqui ninacž kuzquizpacha niiz mantitanaca zizkatcha, nii. Nii Yooziž zizkattacama ana kamtiquiztan casticta cjequiča. Nižaza nii zizkattacama kamchižlaja, nekztan ana casticta cjequiča. Yooz pjalz tjuñquiziqui ninacaž kamtanacquiztan jama pjaltaz cjequiča. ¹⁶Yoozqui Jesucristužquiz žoñinaca pjalzkataquiča, chjojkaca paatiquiztanami, nižaza pinsitaquiztanami. Wejrqui niipan chiichinča liwriiñi Yooz puntu parlican.

JUDIO ŽOÑINACAQUI MOISES LIICHIZZA

¹⁷Yekjap ančhucaquiztan judfo žoñinacžhucča. Ančhucqui Moisés liichiz cjen “Walikaztča wejrqui” cjiñchucča. Nižaza mitarazi kuzziz

cjiñchuc̃ha, “Werar Yoozza wejt Yoozqui”, cjicanaqui. ¹⁸ Añhucqui jaknužt Yooz muñchaja, jalla nii zizza. Añhucqui Moisés lii tjaajintaž cjen Yooz zuma kamaña panž zizza. ¹⁹ Yooz puntu ana zizñi žoñinaca želan, añhucqui cjĩcha, “Nii zuražtakaz žoñinacžquiz tjaajznasak” cjican. Nižaza ana wal zumchiquiztakaz kamñi žoñinaca želan, añhucqui cjĩcha, “Nii ana wal kamñi žoñinacžquiz Yooz zuma kamaña tjaajznasak” kaž cjĩcha; “Werjt̃cha ninacžtaqui kjanažtakaz” cjican. ²⁰ Nižaza añhucqui cjĩcha: “Zumzu kamñi žoñinacžquiz Yooz kamaña sok'o tjaajznasak, ana tsjii kjutñi kamajo”, kaž cjĩcha. Nižaza añhucqui cjĩcha: “Yooz puntu koloculla zizñi žoñinacžquiz tjaajznasak”, kaž cjĩcha. Yooz puntu razunanacaqui Moisés liiquiz kjana žejl̃cha. Jakziltat Moisés lii zuma zizaja, niiqui Yooz puntuquiztan zuma zizñi zizñi cjequĩcha. ²¹ Jaziqui añhucqui yekjžquiz tjaajznasaž niiqui, ċkjažtiquiztan amiž tjaajinta jaru ana kamjo? Nižaza yekjap añhucquiztan chiižiniñchuc̃ha, tuž cjican: “Anãcha tjañi zaazqui”. Jalla nuž chiižcu, ċkjažtiquiztan añhucpacha tjañi zaajo? ²² Nižaza añhucqui cjiñchuc̃ha; “Anãcha adulteriuquiz ojklayzqui”. Jalla nuž chiižcu, ċkjažtiquiztan añhucpacha adulteriuquiz ojklayjo? Añhucqui žoñiž paata yooznaca chjaawj̃cha. Jaziqui, ċkjažtiquiztan añhucqui timplu cusasanaca cjižjo? ²³ Añhucqui mit kuzziz cjiñchuc̃ha: “Wejrnacqui Moisés liichizt̃cha”. Jalla nuž chiižcu, ċkjažtiquiztan añhucqui nii lii ana cazjo? Añhucqui nižta ana cazziž cjen Yoozquiz ana risp̃t̃cha. ²⁴ Cjijrta Yooz takuqui razunapanž chiĩcha. Yooz takuqui tuž cjĩcha:

“Añhuc̃až uj paachiž cjen yekja wajtchiz žoñinacaqui ultim werar Yooz quintraz chiĩcha”.

²⁵ Tsjii chiižinũcha. Añhuc judío jilanacaqui Moisés lii jaru janchiquiz chimputa cjissiñchuc̃ha. Moisés lii jaru kamchiž cjẽchaj niiqui, añhucžtaqui nii chimputa wal̃cha. Pero Moisés lii jaru ana kamchiž cjẽchaj niiqui, nii chimputaqui anaž wal̃cha. ²⁶ Jaziqui tsjii ana chimputa žoñiqui Moisés lii jaru kamchi cjẽchaja, jalla niiqui Yooz yujcquiziqui chimputažtakaz cjequĩcha, niž janchiquiz ana chimputa cjenami. ²⁷ Nižaza jakzilta ana chimputa žoñit Moisés lii jaru kamchi cjẽchaja, jalla niiqui añhuc̃a uj tjeeža. Añhucqui chimputaž cjenami nižaza Moisés cjijrta liichiz cjenami, jalla nii lii ana cazza. ²⁸ Jakziltat juntuñkaz lii jaru paãchaja, jalla niiqui anãcha ultimu Yooz maatiqui. Nižaza jakziltat janchiquiz alaja chimputa cjẽchaja, jalla niiqui anãcha ultimu Yooz maatiqui. ²⁹ Pero jakziltat tjapa kuztan Yooz kuzcama kam̃chaja, jalla nĩcha ultimu Yooz maatiqui. Nižaza niiqui persun kuzquiz ultimu Yooziž chimputãcha. Tsjii cjijrta lii jaru juntuñkaz kamz anãcha chekanaqui. Žoñž kuzquiztañcha kamz chekanaqui, lijituma Yoozquin kuzziz, už ana lijituma Yoozquin kuzziz, nii. Jalla nižta lijitum kuzziz žoñiqui Yooziž tjaata honorchizza. Žoñiž tjaata honora anaž importĩcha.

3 ¹ Yooz yujcquiziqui judío žoñinacaqui yekja wajtchiz žoñinacžquiztan tsjan walasaž niiqui, ċhjuljapat waljo? Nižaza janchiquiz chimputaqui, ċhjuljapat waljo? ² Judío wajtchiz žoñinacaž cjican, zuma wal̃cha. Tužũcha primer razunaqui. Judío žoñinacžquiz Yoozqui niž cjijrta

taku cumpjiichiċha. ³Nii Yooziċ tjaata lii jaru yekjap judío žoñinacaqui ana litituma kamchiċha. Jalla nuž ana litituma kamchiċ cjen, ninacaž compromitta taku ana cumplissiċha. Jalla nuž cjenami Yoozqui niiz persun compromitta taku cumpliċha. ⁴Nužupanċha. Yoozqui taku chiizcu panž cumpliċha, tjapa žoñinacaž chiita taku ana cumplichiž cjenami. Cjijrta Yooz takuqui tuž cjiċha:

“Yooz, amiž chiitaqui lititumaċha. Jalla nii ziztaj cjila. Žoñinacaž am quintra uj tjojtunchiž cjenami amqui lititumapankaz tjeežtaj cjila”.

⁵Žoñinacaž toscara chiitaqui juc'ant tjeeža, Yoozza lititumaqui, nii. Jaziqui, ċkjaž cjeequi? Yoozqui nii toscara chiiñi žoñinaca ana casticiz waquiziċha. ċNuž chiyasajo? ⁶Anapanċha. Yoozqui lititumapanċha. Nižaza Yoozqui uj paañi žoñinaca ana casticaquiž niiqui, inakaz jusjasasċha.

⁷Yekjapanacaqui tuž cjiñiċha: “Wejt toscara chiitaqui, Yooz lititumaž, nii tjeeznaquiž niiqui, ċkjažtiqiztan wejrqui casticta cjesajo? Weriž toscar chiitiqiztan Yoozqui juc'anti rispitta cjesasċha”. ċJalla nuž pinsichinċhucjo? Jalla nii razunaqui ancha zumzuċha.

⁸Nižaza yekjapanacaqui cjiñiċha: “Anazuma paatiquiztan zuma paaznaca tsjan kjana tjeeža cjesasċha. Nekztan nii anazumanaca paaz waquiziċha”. Nižaza cjiñiċha: “Pablo zakaz nuž tjaajñiċha”. Jalla nuž cjican, yekjap žoñinacaqui wejtnac quintra chiiċha, wejrnacaž ana rispitta cjeyajo. Jalla niža chiiñi žoñinacaqui casticta cjis waquiziċha.

TJAPA ŽOÑINACAQUI UJ PAAĊHA

⁹Nekztan, ċkjaž cjii? ċUċhum judío žoñinacaqui parti žoñinacžquiztan

tsjan wali žoñinacajo? Anapanž cjesasċha. Wejrqui kjanapacha tjeezinċha, judío wajtchiz žoñinacami nižaza yekja wajtchiz žoñinacami tjappacha ujž mantuquiz žejlċha, nii. Tjapa žoñinacami uj paazquin kuz tjaaċha. ¹⁰Jalla nižtapacha cjijrta Yooz takuqui cjiċha:

“Anaž jec lititum kamañchiz žoñimi žejlċha, ana zintallami. ¹¹Anaž jec Yooz kamaña intintiñimi žejlċha, anaž jecmi Yoozta kamzquin kuz tjaaċha. ¹²Tjapa žoñinacaqui Yoozquiztan tsjii kjutñi zarakċha, nižaza ana zum kuzziz cjissa. Anaž jakziltami zuma paañic žejlċha, ana zinta. ¹³Ninacž joranacquitzan anazuma chiitanaca ulanċha, ticzinacž sipultura cjetžtažokaz. Chiican, žoñinaca incallċha. Zkorž atquiz žejlñi venenožtakazza ninacaž atquiztan chiitaqui. ¹⁴Ninacaž chiitaqui žoñž quintrapanċha, nižaza žoñžtan chjaawjkatċha. ¹⁵Ninacž kjojchaqui apura zajtċha, žoñi conzjapa. ¹⁶Ninacaqui žoñi akz pecċha, nižaza žoñžquiz llaquit kuzziz cjiskatċha. ¹⁷Nižaza llan kuzziz kamaña anapan zizza. ¹⁸Nižaza werar Yooz rispits puntuquiztan anaž pinsiċha”.

¹⁹Jakziltat tuqita Moisés lii mantuquiz žejlċhaja, jalla niiqui nii lii jaru kamstanċha. Pero tjapa nii liichiz žoñinacaqui ana nii lii jaru kamċha. Jalla nižtiqiztan ch'uju cjissiċha. Ana chiyasasċha, “Wejrqui ana ujchiztċha” cjicanaqui. Tjapa žoñinacaqui, jaknuž kamċhaja, jalla nii cuenta Yoozquin tjaastanċha. Tjapa žoñinacaqui Yooziž casticta cjis waquiziċha. ²⁰Anaž jakziltami Moisés lii jaru zumpacha

lijituma kamčha. Jalla nižtiquiztan Yooz yujquiziqui anaž jakziltami ana ujchizza. Moisés lii zizcumi uj paaspančha. Jalla nižtiquiztan nii lii jaru ana kamtiquiztan tjapa žoñinacaqui zizza, panž ujchizza, nii.

¿ŽOÑINACAQUI, JAKNUŽT ANA UJCHIZ CJESAJO?

²¹ Moisés liiquiztan Yoozqui yekjat lii jaru žoñinacžquiz ana ujchiz nižaza zuma cjiskatčha. Pero nii puntu Moisés liimi nižaza profetanacaž cjiirta takumi zakaz chiičha. ²² ¿Jaknužt žoñinacaqui ana ujchiz cjesajo? Jalla tužučha. Jakziltat Jesucristužquiz kuz tjaačhaja, jalla niiqui Yooz yujquiziqui ana ujchiz nižaza zuma cjequičha. Yoozqui žoñinaca ana illillza. ²³ Tjapa žoñinacaqui tsjii pariju ujchizza. Jalla nižta ujchiz cjenaqui Yoozqui ana jecžquizimi honorchiz cjiskatasachha. ²⁴ Pero Jesucristuqui ujchiz žoñinacžta persun wiržtan pacchičha, ninaca ana casticta cjeajajo, nižaza Yooz yujquiz zuma cjeajajo. Yoozqui Jesucristo cučanžquichiž cjen žoñinacžquiz pajk fatora paachičha. Jalla nuž cjen Yoozqui inat žoñinaca liwriyasachha, ninaca ana čhulu paažcu. ²⁵ Yooz Ejpqui Jesucristo cučanžquichičha ujchiz žoñinacž laycu ticzjapa. Niiž ticziž cjen jakziltat Jesucristužquin kuz tjaačhaja, jalla niiqui persun ujquiztan ana castictaž cjequičha. Tuquitan ima Jesucristuž ticznana Yoozqui niižquin kuzziz žoñinacžtajapa pasinsis kuzziztačha; ninaca ana casticchičha. Pero Yoozqui uj paañinaca casticstančha. Jalla nuž cjenami Jesucristuž cjen Yoozqui ujchiz žoñinaca pertunasachha. Jalla nižtiquiztan Jesucristo cučanžquichiž cjen Yoozqui, persun kuz zuma lijitumaž, jalla nii tjeezičha. ²⁶ Uj

paañi žoñinaca ana castictaž cjenami, Yoozqui lijitumačha. Uj paañi žoñinacaqui Jesucristuž ticziž cjen ana castictačha. Jakziltat Jesucristužquin kuz tjaačhaja, jalla niiqui Yooz yujquiziqui zuma cjissa, ana ujchiz, Jesucristuž cjen.

²⁷ Jaziqui žoñinacaqui anapanž mitarazi kuzziz cjis waquizičha, “Yooz yujcquin walikaztčha wejrqui” cjicanaqui. ¿Kjažtiquiztan mit kuzziz ana nuž chiyas? Anaž jecmi Moisés lii jaru zuma kamchucaqui. Jalla nižtiquiztan ana lii jaru kamchiž cjen tjapa žoñinacaqui Yooz yujquiz ujchizza. Jesucristužquin kuz tjaačhiquiztan, jalla nužquizkaz Yooz yujquiz zuma cjesačha, ana ujchiz. Jalla nižtiquiztan žoñinaca ana mitaraz kuzziz cjis waquizičha. ²⁸ Wejrqui kjanapacha tjaañinchinčha, Jesucristužquin kuz tjaačhiž cjen Yooz yujquiz ana ujchiz nižaza zuma cjesačha, jalla nii. Moisés lii jaru kamchiž cjen Yooz yujquiz anapančha zuma kuzziz cjichuca.

²⁹ ¿Yoozqui judío žoñinacž Yooz alaja cjesajo? Anapančha. Yoozqui parti žoñinacž Yooz zakazza. ³⁰ Zinta Yoozqui žejlčha. Jalla niiž yujquiziqui chimpata judío žoñinacami ana chimpata yekja wajtchiz žoñinacami Jesucristužquin kuz tjaačhiž cjenkaz zuma cjesačha, ana ujchiz. ³¹ Jalla nižtiquiztan nuž tjaañincan wejrqui, “Moisés liiqui anaž walčha”, čnuž cjan tjaañojo? Anazal nižta tjaañnučha. Liiqui panž walčha, cjiwčha.

ABRAHAMŽ PUNTU

4 ¹ Wejrnacqui Abrahamž majch maatinacquiztan tjoñiñčhumčha. Tuqita atchi Abraham ejpž puntuquiztan, ¿kjaž cji? ² Abrahamqui Moisés lii jaru kamtasaz niiqui Yooz

yujcquiz ana ujchiz cjitasacha. Nižaza “Wejrtča Yooz yujcquiz zumtqui” cjican chii attasacha. Pero ana nuž chii atatča Yooz yujcquiziqui. ³Cjijrta Yooz takuqui tuž cjiča: “Abrahamqui Yoozquin kuz tjaachiča. Jalla nižta kuz tjaatiquiztan Yooz yujcquiz zumaž cjissiča, ana ujchiz”. ⁴Tsjii zakal chiyuča. Jakziltat langznačhaja, jalla niqúi paca tanznaquiča. Nii pactaqui anača onanta, pero langztiquiztan nižta pacta cjis waquiziča. ⁵Pero jakzilta ujchiz žoñinacat ana čhulu paačcu, Yoozquin kuz tjaachaja, jalla niž kuz tjaatiquiztankazza Yooz yujcquiz ana ujchiz, nižaza zuma kuzziz. Ujchiz cjicanpacha kuz tjaatiquiztan Yoozqui cjiča, “Nii žoñ uj pertunuča. Wejt yujcquiz ana ujchiz”. ⁶Ana čhulu paačcu nii kuz tjaañi žoñiqui ana ujchiz cjissa. Jalla nižta kuz tjaañi žoñi puntu David cjeta tuquita ejpqui ⁷tuž cjichiča:

“Jakzilta žoñinacž ujnacat Yooziž pertunta cječhaja, nižaza ninacž ujnacat Yooziž ana iya tjeežta cječhaja cuntintuž cjila.

⁸Nižaza jakzilta žoñinacat ujnacquiztan Yooz Jiliriz ana casticta cječhaja, jalla nii žoñiqui cuntintuž cjila”.

⁹Nii Davidž chiitauqui ¿jec žoñi puntuquiztantajo? ¿Chimputa žoñinacž puntuquiztan alajakazkaya? ¿Už yekja wajtchiz ana chimputa žoñinacž puntuquiztan jaa? Wejrqui cjiwčha pizcquiztanpachača.

Abrahamqui Yoozquin kuz tjaachiž cjen Yooz yujcquiz ana ujchiz cjissiča.

¹⁰¿Čhjulorquiztanpacha ana ujchiz cjissitaya? ¿Ima chimpuchiz cjen? už čchimpuchiz cjen jaa? Wejrqui cjiwčha, anača chimpuchiz cjen Yooz yujcquiz ana ujchiz cjissiqui, pero ima chimpuchiz cjen. ¹¹⁻¹²Ima

chimputa cjican Abrahamqui Yoozquin tjapa kuz tjaachiča. Jalla nižtiquiztan Yooz yujcquiz ana ujchiz nižaza zuma cjissiča. Jalla niiž wiruñ Yoozqui nii chimputa lii mantichiča tjeezjapa kuz tjaachiž cjen Yooz yujcquiz ana ujchiz, zuma kuzziz, jalla nii tjeezjapa. Jalla nižtiquiztan Abrahamqui tjapa Yoozquin kuz tjaañinacžta ejpžtakazza, ana chimputa žoñinacžtami, nižaza chimputa žoñinacžtami. Jalla nuž pinsichiča Yoozqui. Jakziltat kuz tjaachiž cjen Yooz yujcquiz ana ujchiz, nižaza zuma kuzziz cjisnačhaja, jalla ninacauqui Abrahamž ultim majchmaatinaca cjequiča. Učhum Abraham ejpqui ima chimputa cjican Yoozquin kuz tjaachiča. Jakzilta chimputa žoñinacat Abrahamžtapacha Yoozquin kuz tjaachaja, jalla ninacauqui Abrahamž ultim majchmaatinaca cjequiča. Chimpatakaz ana walčha, Yooz yujcquiz zuma cjeajajo.

YOOZIŽ TJAATA TAKU

¹³Yoozqui Abrahamžquizimi niiž majchmaatinacžquizimi compromitcan taku tjaachiča, tii muntuquiz cuntintuž cjequiča, jalla nii. Abrahamž lii jaru kamtiquiztan Yoozqui ana nižta taku tjaachiča. Pero Yoozquin kuz tjaachiž cjen nižaza zuma kuzziz cjen, Yoozqui nižta taku tjaachipanča. ¹⁴Moisés liichiz kamñi žoñinacauqui tii muntu irinsa tanznačhaj niqúi, jalla nižtiquiztan Yoozquin kuz tjaazqui inakazza. Nižaza Yooziž tjaata taku anaž walkatča. Pero anača nižta. Anaž jecmi nii lii jaru zuma kamasacha. ¹⁵Jaziqui lii jaru ana kamtiquiztan žoñinacauqui casticta cjistanča. Lii ana žejltasacha, nektan lii quintra ana kamtasacha.

¹⁶Jalla nižtiquiztan Yoozquin kuz tjaatiquiztankaz Yooz yujcquiz ana

ujchiz, nižaza zuma kuzziz cjesača. Nižaza Yoozqui žoñinacžquiz okziž cjen žoñinaca ana ujchiz cjisatkača. Jalla nii wali pajk fava paachiča Yoozqui. Jalla nuž cjen Yooziž tjaata takuqui tirapanž walča tjapa Abrahamž majchmaatinacžtaqui, Moisés liichiz žoñinacžtami, ana Moisés liichiz žoñinacžtami.

Yooziž tjaata takuqui walča tjapa Abrahamžtapacha Yoozquin kuz tjaachinacžtaqui. Abrahamqui tjapa učum Yoozquin kuz tjaachi žoñinacž ejpžtakazza. ¹⁷Jalla nužupanž cjiirta Yooz takuqui chiiča, tuž cjan: “Amqui wacchi nacionchiz žoñinacž epim cjequiča”. Jalla nižtiquiztan Abrahamqui učum ejpžtakazza, Yooz yujcquiziqui. Abrahammi učumnacami nii zinta Yoozquin kuz tjaachinčhumča. Nii zinta Yoozqui ticzinacami jacatatskatkača, nižaza ana žejlñinaca žejlžkatkača.

¹⁸Abrahamžquiz Yoozqui cjichiča: “Amqui wacchi nacionchiz žoñinacž epim cjequiča”. Jalla nii puntuquiztan zakaz Yoozqui Abrahamžquiz cjichiča: “Jalla nuž amqui wacchi majchmaatinacchiz cjequiča”. Yooz taku criichiž cjen Abrahamqui wacchi majchmaatinaca tjew tjewziča, chawcwacama. Tsji žoñinacž “Amiž tjaata Yooz taku ana cumplita cjesača” nuž chiiñi cjenami Abrahamzti tira tjewziča, Yooz taku cumplispanž cjan. ¹⁹Abrahamqui jos patac watchiz cjen ticz orquiztača. Ana majchchizpan cjichucatača. Nižaza niž maatakaqui ana zinta majtchucatača. Jalla nuž pucultan ana majtchuca cjanami, Abrahamqui Yoozquin anača upa kuzziz. ²⁰Nižaza ana kuz turwayskatchiča. Yooziž compromitta taku cumplis ora tirapan tjewziča, cumpliscama. Tirapantača

Yoozquin kuzziz. Nižaza Yooz honora waytican, juc'anti Yoozquin kuzziz cjissiča. ²¹Abrahamqui zizziča, Yoozqui niž compromitta taku ultimupan cumpli atasacha. Jaziqui tirapan tjewznatkača, ana kuz paysnakžcu. ²²Jalla nižtiquiztan nižta Yoozquin kuz tjaatiquiztan Abrahamqui Yooz yujcquiz ana ujchiz cjissiča, nižaza ancha zuma kuzziz. ²³Jalla nuž Yooz tawk liwruquiz cjiirtatača. Nii cjiirtaqui anatača Abrahamž cjen alajakaz, ²⁴učumnacaltajapa zakaz cjiirtatača. Jakziltat Yoozquin kuz tjaachaj niiqui, Yooz yujcquiz ana ujchiz cjisnasača. Nii Yoozqui učum Jesucristo Jiliri ticziquiztan jacatatchiča. ²⁵Jesucristuqui učum ujquiztan contatača; nižaza niž jacatatchiž cjen učumqui Yooz yujcquiz ana ujchiz nižaza zuma cjissinčhumča, nižquin kuz tjaachiž cjen.

YOOZQUIN KUZZIZ ŽOÑINACA

5 ¹Jalla nižtiquiztan Yooz yujcquiz ana ujchiz, nižaza zuma kuzziz cjen, Yoozqui anača učum quitra. Jesucristo Jiliriž cjen, nižaza nižquiz kuzziz cjen učumtan Yooztan walikazza. ²Jesucristužquin kuzziz cjen učumqui Yooz partiquiz luzzinčhumča. Jalla nii partiquiz učumnacaqui panž žejlča. Jalla nuž žejlcan cuntintuž tjewža, Yooziž tjaata honora tanz ora, Yooztan honorchiz cjisjapa. ³Nii Yooz zumanaca tjewžcan, učumqui cuntintučhumča. Nižaza sufris želanaqui cuntintuzakazza. Sufrisquiztan pasinziz kuzziz cjissa. Jalla niiqui učumqui zizza. ⁴Nižaza pasinziz kuzziz žejltiquiztan Yoozquin tjurt'iñi kuzzizpan yatisinsa. Jalla nekztan zumquin yatisinžcu, Yooz honora tjaaz ora tjewža. ⁵Yoozqui niž

Espíritu Santo učumnaca kuzquiz luzkatchiċha. Nii Espiritu Santuqui učum kuzquiz luzcu, Yooz ancha zuma munaziċi kuz učumquiz intintiskatchi. Jalla niċtiquiztan Yooziċ tjaata honora tjewċcan učumqui zizza, ultimquiziqui panċ tanznaquiċha, nii. Ana inakaz tjewznaquiċha.

⁶Uċhumpacha ujquiztan anataċha liwriizuca. Jalla niċtiquiztan Yooziċ pinsita timpuquiz Cristuqui ujchiz ŋoċinacċ laycu ticziċha. ⁷Anaċ jakzilta ŋoċimi tsjii ŋoċtjajapa pjasila ticznasaċha, zuma ŋoċi cjenami. Cunamit tsjii ancha zuma kuzziz ŋoċtjajapa ticz pecaċhani. ⁸Yoozti niċ zuma okċi kuz tjeeziċha, jalla tiċta. Uċhumnaca ujchiz cjenami Yoozqui niċ Majch Jesucristo cuhanċquichiċha, uċhumnacaltajapa ticzjapa. ⁹Jalla niċtiquiztan Yooz Majch ticziċ cjen anziċui učumqui Yooz Ejpċ yujcquiz ana ujchizza, niċaza zuma kuzzizza. Jalla niic zuma razunaċha. Jaziċui učumqui zuma kuzzizza. Jalla niċtiquiztan tiizakaz zuma razunaċha: Jesucristuċ ticziċ cjen učumqui ultim castic tjuċquiziqui liwriitaċ cjequiċha Yooz casticquiztan. ¹⁰Tuquitan uċhumnacaqui Yooz quintrataċha. Jalla nuċ Yooz quintr želanami, Yoozqui niċ Majch cuhanċquichiċha, ŋoċinacċ laycu ticzjapa, ŋoċinacaċ pertunta cjeajo. Jalla niċui razunaċha. Niċaza anziċui učumqui Yooz pertuntaċha. Jalla niċtiquiztan učumtan Yooztan walikazza. Niċaza Yooz Majch jacatattiquiztan učumqui ultimquiziqui tjapa anawalinacquiiztan liwriitapanċ cjequiċha, Yooztan wiċaya kamzjapa. Jalla niċui zuma razunazakazza. ¹¹Ultimquiziqui liwriitaċ cjequiċha. Niċaza anzimi liwriitazakaz učumqui. Jalla niċtiquiztan učumqui Yooztan tsjii

kuzziz cjican, cuntintuċha, Jesucristo Jiliriċ cjen. Jesucristuċ cjen učumqui Yooziċ pertunta cjissiċha. Jalla niċtiquiztan učumtan Yooztan walikazza.

ADANċTAN JESUCRISTUċTAN

¹²Tsjilla cjesaċha. Tsjii ŋoċiċ cjen uj ŋejlċha tii muntuquiz. Niċaza nii ujquiztan ticz ŋejlċha. Niċaza tjapa ŋoċinacami uj paaċha. Jalla nuċ uj paaċcu, ticċa. ¹³Moisċs liiċ tuquiqui uj paazqui ŋelatċha tii muntuquiz. Pero ana liichizlaj niċui, ŋoċinacaqui nii lii quintr paata ujquiztan ana castictataċha. ¹⁴Adanċ timpuquiztanpacha Moisċs timpucama ŋoċinacaqui ticziċha uj paatiquiztan. Jaknuċt Adán primera uj paatċhaja, jalla nii ujpacha ana paachiċha parti ŋoċinacaqui. Jalla nuċ cjenami yekja ujnaca paachiċha. Adanqui tjonċi Jesucristuċtakaz tjapa tii muntuquiz ŋejlċi ŋoċinacċquiz contajichiċha. Jalla nii puntuquiztan Adanċtan Jesucristuċtan cassa.

¹⁵Pero tii puntuquiztan anaċ cassa. Adanċ uj paatiquiztan anawalinaca ŋejlċha. Cristuċ ticztiquiztanztii zumanaca zejlċha. Tsjii ŋoċiqui uj paachiċ cjen tjapa ŋoċinacċquiz ticskatċha. Jalla niċha Adanqui. Niċaza tsjii ŋoċiċ cjenkaz walja ŋoċinacaqui ujquiztan liwriitaċha. Jalla niċha Jesucristuqui. Jesucristuċ cjen Yoozqui ŋoċinaca okziċha. ŋoċinacaċ ana okċta cjichuca cjenami, Yoozqui ŋoċinacċquiz okziċha. Jalla nuċ okztiquiztan Yoozqui Jesucristuċ cjen ŋoċinaca liwriichiċha niċ yujcquiz ujchiz ana cjisjapa. Nuċupanċha. ¹⁶Adanċ uj paatiċtan Jesucristuċ liwriiċiċtan anaċ cassa. Punta puntaċ ŋoċinacċquiz contajichiċha. Adanċ zinta ujquiztan tjapa ŋoċinacaqui pjalċtaċha, casticta

cjisjapa. Pero Jesucristuž liwriitiquiztan walja žoñinacaqui Yooz yujcquiz ana ujchiz nižaza zuma cjisja, walja ujnaca paachiž cjenami. Jesucristuž cjenkaz nižta cjisja. ¹⁷Tsjii žoñž ujquiztan tjapa žoñinacaqui ticstanča. Jalla niic razunača. Tiiqui tsjan zuma razunača. Jakziltat Jesucristuž cjen ujquiztan liwriita cječhaja, jalla niiqui Yooz yujcquiz ana ujchiz cjequiča. Nižaza ujquiztan ticziž cjenpacha, Yooztan wiñaya kamaquiča. Nižaza honorchiz cjequiča.

¹⁸Jaziqui tsjii žoñž ujquiztan tjapa žoñinacaqui pjalžtača casticta cjisjapa. Nižaza tsjii žoñž ticztiquiztan tjapa žoñinacaqui ninacž ujquiztan pertunta cjesača, ninacž ujquiztan ana casticta cjejajo, nižaza Yooztan wiñaya kamajo. ¹⁹Yooz mantita ana cumplichiž cjen Adanqui tjapa žoñinacžquiz ujchiz cjisatča. Jesucristuž Yooz kuz cumplichiž cjen walja žoñinacžquiz Yooz yujcquiz ana ujchiz, nižaza zuma cjisatča.

²⁰Yoozqui Moisesquiz tsjii lii tjaachiča, žoñinacžquiz persun ujnaca kjanapacha tjezejapa. Nii lii zizcuqui žoñinacaqui lii quintrajuc'anti uj paachiča. Jalla nuž juc'anti uj paachiž cjenami, Yoozqui niiž okzñi kuz žoñinacžquiz juc'anti tjeeziča Jesucristuž cjen. ²¹Uj paažcu žoñinacaqui ticstanča, nižaza casticta cjistanča. Pero žoñinacž ujnacquiztan infiernuquin castictaž cjenpacha Yoozqui žoñinaca liwriichiča Jesucristo Jiliriz cjen. Žoñinacaqui Jesucristuž cjen Yooz yujcquiz ana ujchiz, nižaza zuma cjisnasača, Yooztan wiñaya kamzjapa.

EW KAMAÑA PUNTU

6 ¹Uj puntuquiztan yekjapanacaqui chiiñiča. Učhumqui tira uj paaz

waquiziča, Yooz okzñi kuz juc'anti tjeeža cjisjapa. ²Pero wejr cjiwča, anapanž uj paaz waquiziča. Tuquitan ticzi žoñinacažtakaztača učhumqui, anazum kamañchiz kamcan. Pero učhumž tuquitan anazuma uj paañi kamañquiztan jaytichinčhumča. Jalla nižtiquiztan uj paañi kamañchiz anapanž kamz waquiziča. ³Tjapa učhumnacaqui, Jesucristužtan tsjii kuzziz cjissinčhumča. Bautistaž cjen nekz tjeezinčhumča. Jesucristuqui ticžcu, tjatzatača. Jalla nižta irata učhumqui anazum uj paaznaca tjatz waquiziča. Jalla nii učhumnacaqui panž zizza. ⁴Bautista cjisju, nižaza Jesucristužtan tsjii kuzziz cjisju, učhumnacaqui uj paañi kamañquiztan jaytichinčhumča. Nekztan zuma ew kamañchiz cjissinčhumča. Yooz Ejpqui persun aztan Jesucristo ticziquiztan jacatatskatchiča. Jalla nižta irata Yoozqui učhumnaca anazuma kamañquiztan liwriichiča, zuma ew kamañchiz cjejajo.

⁵Jakziltat Jesucristužtan tsjii kuzziz cječhaja, jalla niiqui Jesucristužtan ticziča, anazum uj paañi kamañquiztan liwriita cjisjapa. Nižaza jakziltat Jesucristužtan tsjii kuzziz cječhaja, jalla niiqui Jesucristužtan jacatatchiča, ew zuma kamañchiz cjisjapa. ⁶Jaknužt Jesucristuqui cruzquiz ch'awcta ticzižlaja, jalla nižta irata učhumqui ticzižtakaz cjissiča uj paaz pecñi kuzquiztan. Jalla nižtiquiztan učhum anazum uj paaz pecñi kuzqui nužquiz ana azziz cjissiča. Nižaza nii uj paaz pecñi kuzqui ana iya mantasača učhum kuzquizpacha. Jalla nii učhumqui panž zizza. ⁷Jakziltat uj paaz pecñi kuzquiztan ticzi cječhaja, jalla niiqui uj paañi kamañquiztan liwriita cjequiča. ⁸Nižaza jakziltat

Jesucristužtan tsjii kuzziz cjissiz cjen uj paañi kamañquiztan liwriita cječhaja, jalla niiqui ew kamañchiz cjequičha, Jesucristužtakaz. Nižaza Jesucristužtan chica kamaquičha. Jalla nii razuna criichinchumčha.

⁹Jesucristuqui ticziquiztan jacatatchičha. Jalla nižtiquiztan ana wilta ticznaquičha, nižtaqui ana iya ticz žejlčha. ¹⁰Jesucristuqui žoñinacz ujquiztan ticzičha, tsjii wilta. Ana wilta ticznaquičha. Jaziqui žejtčha, nižaza Yooztajapa kamčha. ¹¹Jalla nižtiquiztan ančhucqui cjuñzna, uj paañi kamañquiz liwriitaž, nii. Jaziqui Jesucristo Jiliriž cjen Yooztajapa ew kamañchiz kamla.

¹²Uj paaz pecñi kuzqui ana mantiskata, anazumanaca paajo. ¹³Nii uj paaz pecñi kuzqui curpu mantis pecčhaj niiqui, panž ewjasa. Pero ančuca curpu zuma paazjapa, nižaza Yooz sirwizjapa kuz tjaa. Ančhucqui anazum uj paañi kamañquiztan liwriita cjiscu ew zuma kamañchiz cjissinchucčha. Jalla nižtiquiztan ančhucqui Yooz kuzcama kamajo Yooz mantuquiz cjee, tjapa curpumi, nižaza kuzmi. ¹⁴Ančhucqui anačha iya Moisés lii mantuquiz. Okzñi Yooz mantuquizza ančhucqui. Jalla nižtiquiztan nii uj paaz pecñi kuzqui ana mantiskata.

YOOZ MANTUQUIZPANKAZ CJEE

¹⁵¿Kjaž cjesajo? Moisés lii mantuquiz ana žejlcan, nižaza okzñi Yooz mantuquiz žejlcan, ¿uj paañi kamañchiz želasajo? Anapanž cjesačha. ¹⁶Jakziltat tsjii žoñž mantuquiz žejlčhaja, jalla nii patrunž mantitanaca caspanikazza. Jalla nižta irata jakziltat uj paaz pecñi kuz mantuquiz žejlčhaja, ujnaca paasačha; jalla nekztan Yooziž castictaž

cjequičha. Nižaza jakziltat Yooz mantuquiz žejlčhaja, jalla niiqui Yooz kuzcama cumplis waquizičha. Jalla nekztan tsjan tsjan zuma kamañchiz cjequičha. ¿Nii ana ziz ančhucjo? ¹⁷Tuquiqui ančhucqui uj paaz pecñi kuz mantuquiz žejlñitačha. Nekztan Yooz puntu zuma werar razunanacaqui ančucaquiz tjaa jintatačha. Jaziqui jalla nii tjaa jintanac jaru tjapa kuztan kamčha. Jalla nižta ančuca zuma kamañchiz cjen Yoozquin gracias cjican chiyučha. ¹⁸Jalla nižtiquiztan nii uj paazquiztan liwriitačha ančhucqui. Nižaza zumanaca paazjapa tjapa kuz tjaa chinchucčha. Yooz manta paaz cjissinchucčha. ¹⁹Žoñž wirquiztan punta punta chiyučha, Yooz puntu intintazkatzjapa. Ana nižta chiitasaz niiqui, ančhucqui anaž intintaztasachha. Tuquiqui ančhucqui uj paaz pecñi kuz mantuquiz želatčha, ujnaca paacan. Jalla nuž žejlcan juc'anti juc'anti uj paachinchuctačha. Jazizti Yooz mantuquiz tsjan tjapa kuztan žela, tsjan zumanaca paazjapa. Jalla nuž žejlcan Yooztakaz tsjan tsjan zuma kuzziz cjisnaquičha.

²⁰Tuquiqui ančhucqui uj paaz pecñi kuz mantuquiz žejlcan, zumanaca paazjapa ana importičha. ²¹Jalla nuž kamcan, ančhucaltajapa ¿čhjul walitajo? Jaziqui ančucaž tuquita paatanacquiztan ančhucaltaqui azipančha. Jalla nižta anazum kamchi žoñinacaqui wiñayjapa Yooziž castictapanž cjequičha. ²²Pero ančhuczi nii anazum uj paañi kamañquiztan liwriitačha. Yooz mantuquiz cjissinchucčha. Jalla nižtiquiztan ančhucqui tsjan tsjan zuma kamañchizza. Nižaza Yooztan wiñayaž kamaquičha. ²³Jakziltat anazum uj paañi kamañquiz kamčhaja, jalla niiqui Yooziž castictaž cjistančha.

Nuž waquizičha. Pero Yoozqui žoñinacžtajapa tsjii pajk fava paachičha, žoñinacaž ana waquizan. Nužukaz paachičha niiž zuma okžni kuzziz cjen. Jaziqui jakziltat Yooziž liwriita cječhaja, jalla niiqui Jesucristo Jiliriž cjen Yooztan wiñayaž kamaquičha.

LII PUNTO

7 ¹ Moisés lii zizni jilanaca, cullaquinaca, ančhucqui zizza, ima ticzcan, žoñinacaqui Moisés lii mantuquiz žejlčha. ² Nižaza tsjaa maatakui zalz kamz lii mantuquiz žejlčha, naaža lucu ticzcama. Naaža lucuž ticznaquiz niiqui, nekztan naaqui nii lucutiñi kamañ liiquiztan liwriitačha. ³ Jaziqui naaža persun lucu žetan, naaqui yekja luctakžtan želaquiz niiqui, jalla naaqui adulterio paačha. Naaža lucu ticznaquiz niiqui, jalla nekz lucutiñ kamañ liiquiztan liwriitačha. Jalla nižtiquiztan yekja lucžtan zalžnanami, anaž adulterio cjesačha.

⁴ Wejt jilanaca, cullaquinaca, jalla nižta iratačha Moisés lii puntuquiztanaqui. Jesucristuqui ančuca ujnacquiztan ticzičha. Niiž cjen ančhucqui Yooz yujcquiz ana ujchizza, zuma kuzzizza. Moisés lii mantuquiz žejlcan, anapan zuma kuzziz cjisni atchucatačha. Jaziqui ančhucqui ticzi žoñižtakazza nii lii puntuquiztan. Jalla nižtiquiztan yekjaž mantuquiz žejlčha, Jesucristuž mantuquiz, tsjii yekja lucžtan zalzižtakaz. Jesucristuqui ticziquiztan jacatatchičha, ančucaž Yooztajapa zumanaca paajo. ⁵ Tuquiqui učhum persun kuzcama kamcan, učhum uj paaz pecni kuzqui učhumnacaquiz mantiñitačha, ujnaca paajo. Jalla nižta ujnaca paatiquiztan infiernuquin Yooziž casticta cjichucatačha. Moisés liiquiz

“Anačha uj paazqui” cjian cjenami učhum uj paaz pecni kuzqui juc'anti uj paazquin učhum chjitchičha. ⁶ Ima Jesucristužquin kuz tjaacan, jalla nižta kamchinčhumčha. Pero jaziqui učhumqui Moisés liiquiztan liwriitačha. Tuquita nii liiž mantuquiz učhum želatčha, preso tanta žoñižtakaz. Anziqui Espiritu Santuž mantuquiz žejlčha. Niiqui učhumnacaquiz ew kamaña tjaachičha.

¿JECT WEJR YANAPASAJO, ZUMA PAAZJAPAJO?

⁷ Jaziqui čkjažu cjeequi? ¿Moisés liiqui anawalejo? Anapanž cjesačha. Moisés lii mantuquiz ana kamtasaz niiqui, wejrqui wejt ujnaca anal pajkattasačha. Moisés liiquiz “Anačha zmazni kuzziz cjee” cjičha. Nekztan wejt zmazni kuz zuma pajchinčha. ⁸ Moisés liiquiz nižta mantita cjen, wejt uj paaz pecni kuzqui tjapamana zmaz pinsichičha. Nii lii quintrancha paaz pecatčha. Pero nii liiqui ana žejltasaž niiqui, jalla nižtiquiztan nii zmazqui anaž paja cjtasakalčha. ⁹ Ima Moisés lii pajcan, cuntintul kamchinčha. Nekztan Moisés lii mantitanaca pajtiquiztan wejt ujnaca pajchinčha, nižaza juc'anti uj paachinčha. Jalla nižtiquiztan persun kuzquiz weriž paata uj zint'ican, llaquita žejlchintačha. Wejt persun uj paatiquiztan Yooz castictal cjis waquizučha. ¹⁰ Wejrqui Moisés lii jaru zumpacha kamtučhaja, jalla nekztan Yooztan cuntintu kamtasachha. Pero nii Moisés lii jaru ana zuma kami atchinčha. Jalla nižtiquiztan nii liiž cjen wejtquiz tjeežtačha, wejr castictal cjis waquizučha, jalla nii. ¹¹ Moisés liiquiz mantitanaca žejlčha. Nii mantitanacaqui zizcuqui wejt uj paaz pecni kuzqui juc'ant uj paaz

pecchiča. Anapan nii lii jaru kami atatuča. Incallta cjissinča. Nii lii jaru ana kamtiquiztan, Yooz casticta cjichucatača.

¹²Moisés liiqui Yooziž mantitatača. Jalla nižtiquiztan ancha zumača nii liiqui. Nižaza nii liiquiz mantitami ancha zumapanča, nižaza Yooz kuzcamača, nižaza wejtta waliča.

¹³Nii liiqui wejtta wali zumažlaj niiqui, ¿kjažtiquiztan nii liiž cjen Yooz casticta cjis waquizasajo? Nii liiqui zumača. Pero nii zuma lii zizcuqui, wejt uj paaz pecni kuzqui juc'anti ana wal uj paaz pecchiča. Jalla nekztan wejt quintra Yooz casticz žejlča. Jalla nižtiquiztan tjeežtača, wejt uj paaz pecni kuzqui ana zumapanča, nii. Nižaza Moisés lii quintra paatiquiztan tsjan juc'ant anazumaž cjissa wejt uj paaz pecni kuzqui.

¹⁴Učhumqui zizza, Moisés liiqui Yooz Espíritu Santuž kuzcamača. Wejrzi persun kuzcama kamz pecuča. Jalla nižta kamcan wejt uj paaz pecni kuz mantuquiz želuča. ¹⁵¿Kjažtiquiztan nižta ana zuma paatojo? Anal intintazuča. Jesucristužquin kuz tjaažcu, jalla nekztanpacha zuma paaz pecni kuzziz cjissinča. Jalla nižta kuzziz cjenami, uj paaz pecni kuzzizpanča. Zuma paaz peccumi, anal zuma payi atuča. Ana pecta uj paaznaca, jalla niikal wila wila paa-uča. ¹⁶Jalla nižta paachiž cjenauqui, wejrqui pajuča, Moisés liiqui zumača, jalla nii. ¹⁷Ana zuma paacanami wejt kuzquiz zuma paaz pecuča. Jalla nižtiquiztan wejrpacha nii anazuma paatanaca anal iyal paaz pecuča. Pero wejt uj paaz pecni kuzqui nii ana zuma paatanaca paakatča. ¹⁸Wejt uj paaz pecni kuzqui ana zumapanča. Yooz aztankaz zuma payi atasacha. Wejrqui

zuma paaz pecanami, wejt persun aztan nii zuma paazqui anal atuča. Weriz kamtiquiztan nii razuna zizni cjissinča. ¹⁹Wejrqui weriz zuma paaz pectanacauqui anal paa-uča. Antiz weriz ana paaz pectanacauqui, nii ana zumanacal paa-uča. ²⁰Jalla nižta ana weriz pectanaca paacan, wejrpacha ana nižta paa-uča. Pero wejt uj paaz pecni kuzqui nižta anazuma paakatča.

²¹Jalla nižtiquiztan wejtquiz nižtapan žejlča. Zuma paaz pecanami, wejt uj paaz pecni kuzkaz mantiz pecča. ²²Wejt kuzquizpacha Yooz kuzcamapan paaz ancha pecuča. ²³Jalla nuž cjenami uj paaz pecni kuzziztča. Wejt curpu mantiz pecča. Jalla nižtiquiztan wejt uj paaz pecni kuzqui wejt zuma paaz pecni kuz quintrača. Wejrqui anazuma paacan wejt uj paaz pecni kuz mantuquiz želuča. Nižaza nii uj paaz pecni kuzqui wejt curpu mantiča. Weriz kamtiquiztan nii razuna zizni cjissinča.

²⁴Ana waliča wejrqui. Jalla nižtiquiztan ¿jequit tii ana zuma paañi curpuquiztan wejr liwriyaquiya? ¿Tii casticzkatni curpuquiztanya?

²⁵Yoozquin gracias cjican, chiyuča, učhum Jesucristo Jiliriča wejt liwriñiqui. Wejrpacha tjapa wejt zuma paaz pecni kuztan Yooz kuzcama kamuča, wejt uj paaz pecni kuz uj paaz pecanami.

ESPIRITU SANTO KUZZIZ ŽEJLČA

8 ¹Jesucristuž partiquiz žejlñi žoñinacauqui ana Yooziž casticta cjequiča. Ninacauqui Yooz Espíritu Santuž kuzcama kamča; uj paaz pecni kuzcama ana kamča. ²Jesucristuž cjen wejrqui Espíritu Santuž mantuquiz želuča. Espíritu

Santuž cjen ew kamañchiz kamuča. Nii Espíritu Santuqui uj paaz pecñi kuz mantuquiztan wejr liwriichiča. Uj paaz pecñi kuz mantuquiz tira žejltasaž niiqui, Yooziž wiñaya casticta cjitasača. ³Žoñinacaž uj paaz pecñi kuz mantuquiz žejlcan, Moisés lii jaru ana kami atchiča. Jalla nižtiquiztan Yoozqui niž persun Majch cuchanžquichiča. Ujchiz žoñižtakaz curpuchiz kamchiča. Pero ana ujchizza niiqui. Žoñž curpuchiz cjican, ujchiz žoñinacž laycu ticziča. Jalla nuž cjen Jesucristuqui ujchiz žoñinacž cuntiquiztan casticta cjissiča, Jesucristužquin kuzziz žoñinaca ana casticta cjejajo. ⁴Moisés liiquiz Yooz kuzcama kamzqui mantitača. Jakziltat uj paaz pecñi kuz mantuquiz kamčhaja, jalla niiqui Yooz kuzcama ana kamča, nižaza Moisés liicama ana kamča. Pero jakziltat Yooz Espíritu Santuž mantuquiz kamčhaja, jalla niiqui Yooz kuzcama kamča.

⁵Jakziltat persun uj paaz pecñi kuzcama kamčhaja, jalla niiqui persun pinsitanacžquikaz kuz tjaača. Pero jakziltat Espíritu Santuž kuzcama kamčhaja, jalla niiqui Yooz Espíritu Santuž pinsitanacžquiz kuz tjaača. ⁶Jakziltat uj paaz pecñi kuz pinsitanacžquiz kuz tjaačhaj niiqui, Yooziz wiñaya castictaž cjequiča. Pero jakziltat Espíritu Santuž pinsitanacžquiz kuz tjaačhaj niiqui, Yooz kamañchiz kamaquiča, nižaza Yooztan nižtan walikaz cjequiča. ⁷Jakziltat persun anazum kuzcamakaz kamz pecčhaja, jalla niiqui Yooz quintrača. Yooz kuzcama anapanž kamz pecča, nižaza anapanž atča. ⁸Jakziltat persun kuzcamakaz kamz pecčhaja, jalla nuž kamtiquiztan Yoozqui anapanča cuntintu.

⁹Ančhucztí persun kuzcamakaz anaž kamča. Yooz Espíritu Santuž

ančuca kuznacquiz žejlchiž cjen, ančhucqui Espíritu Santuž kuzcama kamča. Jakziltat ana Jesucristuž Espirituchizlaja, anača Jesucristuž partichiz žoñiqui. ¹⁰Jesucristuž ančuca kuznacquiz žejlchiž cjen Yooz yujcquiz ana ujchizčhucča, nižaza zuma kuzzizčhucča. Nižaza ančuca animunacaqui ew zuma kamañchizza. Uj paachiž cjen ančuca curpunacaqui ticznaquiča. Jalla nuž cjenami ančuca animunacaqui Yooztan wiñaya kamča. ¹¹Yooz Ejpqui niž Espíritu Santuž cjen Jesucristo ticziquiztan jacatatskatchiča. Nii Yooz Espíritu Santuqui ančuca kuzquiz žejlča. Jalla nižtiquiztan Yooz Ejpqui niž Espíritu Santuž cjen ančuca ticzi curpunaca zakaz jacatatskataquiča.

¹²Jilanaca, cullaquinaca, tsjii mantuquiz kamspanča učumqui. Anača uj paaz pecñi kuz mantuquiz kamzqui, persun kuzcamakaz paazjapa. Pero Yooz Espíritu Santuž mantuquiz kamsa. ¹³Jakziltat persun kuzcamakaz kamchiž cječhaja, jalla niiqui Yooziž wiñaya castictaž cjequiča. Pero jakziltat Espíritu Santuž mantuquiz žejlčhaja, jalla niiqui uj paaznaca jaytiča. Jalla nuž ujnaca jaytichiž cjen, Yooz kamañchiz kamaquiča.

¹⁴Jakziltat Yooz Espíritu Santuž irpita cječhaja, jalla niiqui Yooz maatiča. ¹⁵Ančhucqui Yooz maatinacchucča. Jaziqui Espíritu Santuqui ančuca kuznacquiz luzziž cjen, ana Yoozquiztan eksñi kuzzizza. Espíritu Santuž cjen, “Učhum Yooz Tata”, ¹⁶jalla nuž cjican učhum kuznacaqui chiiča. Nižaza kuzquiz sint'iskatča, učhumča Yooz maatinacaqui, jalla nii. ¹⁷Nižaza Yooz maatinacaž cjen Yooziž tjaata zuma irinsa tanznaquiča, jalla nii irinsača Yooztan wiñaya kamzqui,

Jesucristužtan chica. Tii muntuquiz kamcan Jesucristuqui sufrichiča. Učhumqui Jesucristužquiz sirwichiž cjen zakaz sufraquiž niiqui, nekztan arajpachquin niižtan chica honorchiz cjequiča.

¹⁸Tii timpuquiz sufrisnacaqui anača ancha. Cjuñzna, Yooziž tjaata honorača ancha zuma. Jalla nuž cjuñžnuča wejrqui. Jesucristuž tjonz tjuñquiziqui učumnacaqui zuma honorchiz cjequiča. Jalla nii tjeežtaž cjequiča. ¹⁹Tjapa tii muntuquiz žejlñinacaqui ančaž tjewža, Yooz maatinacž honora tjeez tjuñi. ²⁰Adanž uj paatiquiztan tjapa tii muntuquiz čhjultakimi inakaz cjissiča. Yooz munan jalla nuž cjissiča. Anača juyztokaz inakaz cjissiča. Pero tsjii noojiqui tii muntumi tii muntuquiz žejlñinacami anawalinacquiztan liwriitaž cjequiča. Jalla nii tjuñi tjewža. ²¹Jalla nii noojiqui tii muntumi tii muntuquiz žejlñinacami tjapa ana walinaquiztanami liwriitaž cjequiča. Ticzmi anawali watñinacami ana želaquiča. Liwriitiquiztan tii muntumi tii muntuquiz žejlñinacami liwj zamacama cjiskattaž cjequiča, jaknužt Yooz maatinacaqui zumapan cjiskattaž cječhaja, jalla nižta irata. ²²Adanž timpuquiztanpacha tii timpucama tjapa tii muntuquiz žejlñinacaqui sufriča jaknužt tsjaa ic maataka majtz ora sufrichaja, jalla nižta ancha ayincan žejlča. ²³Učhum kuzquiz zakaz ancha sufriča, Espiritu Santuchiz cjenami. Nii Espiritu Santuqui tsjii zuma adelanto učhum kuzquiz žejlča. Jalla nuž cjen učhumqui ancha tjewža, juc'ant tsjan zuma kamañchiz cjsjapa. Učhumqui Yooz maatinacaž cjitiquiztan nii zuma kamañchiz cjsnaquiča. Nižaza učhum Yooz maatinaca cjan, ew

curpuchiz cjsnaquiča. ²⁴Jalla nuž učumnacaqui tjewža liwriitaž cjen. Čhjulunacat chertčhaja, jalla nii chertanaca ana tjewžta cjequiča. ĽJec žoñit chertanaca tjewznasajo?

²⁵Učumnacaqui ana chertanaca tjewža. Yoozquiztan tjonñi zumanaca tjewža. Jalla nižtiquiztan pasinziz kuztan tjewstanča.

²⁶Jaknužt učhum zuma tjewzqui sufris awantizjapa yanapčhaja, jalla nižta irata Yooz Espiritu Santuqui učhum yanapčha tjurt'iñi kuzziz cjsjapa. Učhumqui Yoozquiztan jaknužt mayiziz waquizičhaja, ana zizza. Jalla nižtiquiztan Yooz Espiritu Santupacha učhumnacalta ancha mayižinñiča, nižaza niipachaž ancha sint'iča učhumnacalta. Nii Espiritu Santuž mayižintaqui žoñž tawkžtan ana chiita cjesača. ²⁷Espiritu Santuqui criichi žoñinacžta mayižinñiča Yooz Ejpž kuzcamakaz. Jalla nuž mayižinan kuzquiz zizñi Yooz Ejpqui nii Espiritu Santuž kuzquiz pinsitanaca zizza. Jalla nižtiquiztan Yooz Ejpqui Yooz Espiritu Santuž učhumnacalta mayižintanaca zizza.

YOOZ EJPQUI NIIŽ MAATINACŽTAN ANCHA MUNAZIČHA

²⁸Yoozqui niž pinsitacama žoñinaca kjawziča, niž maati cjiskatajo. Jalla nii kjawžta žoñinacaqui Yooztan zuma munaziča. Jalla nii munazita žoñinacžta Yoozqui čhjulu cjenami mantiča ninacžta zuma cjsjapa. Učhumqui nii zizza. ²⁹Yoozqui tuquitanpacha zizziča, jecnacat niž maatinaca cjsnačhaja, jalla nii. Nižaza tuquitanpacha Yoozqui niž maatinaca utchiča, niž zinta Majch irata cjsjapa, jalla nižta zuma cjsjapa. Jalla nuž Yoozqui pinsichiča, niž zinta Majchqui jilir

jila cjisjapa, tjapa Yoozquin criichi žoñinacžquiztan juc'ant honorchiz cjisjapa. ³⁰Yooz Ejpmi jecnacat niž maatinaca cjisnačhaja, nii pinsichiča. Ninaca kjawwizakazza. Nižaza Yoozqui jecnacat kjawwtčhaja, jalla ninaca ana ujhiz cjiskatča. Nižaza Yoozqui jecnacat ana ujhiz cjistčhaja, jalla ninaca juc'ant zuma kamañchiz cjiskatča.

³¹Tjapa nii puntuquiztan učhumqui, ¿kjaž iya cjequejo? Yoozqui učhumnacaltajapapanča. Jalla nižtiquiztan čject učhum atipasajo? Anaž čjulumi. ³²Yoozqui niž zinta Majch ana chjojchiča, antiz učhumnacaltajapa utchiča, učhum laycu ticzjapa. Jalla nuž niž zinta Majch utchiž cjen učhumnacaquiz tjapa niž zumanaca zakaz tjaaquičha, juc'ant zuma kamañchiz kamajo.

³³Nižaza Yooz illzta žoñinacžjapa anaž jecmi uj tjojtasača. Yoozpacha ninaca ana ujhiz cjiskatchiča.

³⁴Jalla nižtiquiztan čject Yooz illzta žoñinacžquiz “Casticta cjistanča” cjan chiyasajo? Anaž jecmi. Jesucristučha ninacž laycu ticziqi. Nekztan ticziquiztan jacatatchiča. Anziqi Yooz Ejpmi žew kjarquiz žejlča, tjapa mantican. Jalla nii Jesucristupachača učhumnacalta tjurt'izinñiqui. ³⁵Čjulunacaž watanami Jesucristuqui učhumnacatan munaziča: sufris watanami, llaquinaca watanami, chjaawjkatñi watanami, mach'a watanami, ana zquiti žejlž watanami, ana waliž tjonanami, ana wali ticz watanami, čjulunacaž watanami Jesucristuqui učhumnacatan munaziča. ³⁶Cjijrta Yooz takuqui tuž cjiča:

“Yooz partiquiz žejlchiž cjen učhumnacaqui sufrican sufrican zapuru ticzmayažtakaz žejlča.

Učhum quintra žoñinacaqui tantiiča, criichi žoñinacaž contaj cjila, cjan. Conz uuzanacažtakaz učhumnacaquiz nayča”.

³⁷Pero čjulunacaž watanami Jesucristuqui učhumnacatan panž munaziča. Nižaza čjulunacaž watanami učhumnacaqui Jesucristuž cjen tjapa nii anawalinacžquiztan atipaquičha. ³⁸Anaž čjulumi Yooz učhumnacatan ana munazizkati atasacha: anaž ticzmi, anaž žetimi, anaž anjilanacami, anaž mantinñinacami, anaž poderchiznacami, anaž anztan žejlñinacami, anaž jaztan žejlñinacami, ³⁹anaž tsewcta poderanacami, anaž tii yokquiz žejlñi poderanacami, anaž čjul paatanacami Yooz učhumnacatan ana munazizkati atasacha. Yoozqui učhumnacatan panž munaziča, učhumnacatan Jesucristo Jiliržtan tsjii kuzziz cjen.

JUDIO WAJTCHIZ ŽOÑINACA

9 ¹Tsjilla cjesača. Jalla tii puntuquiztan wejrqui zuma razunapal cjiwča. Jesucristužquiz kuzziz cjen razunal chiyučha, anal toscara chiyučha. Espíritu Santuqui wejt kuz zizza. Lijituma cjiwča. ²Ancha llaquizuča, nižaza wejt kuzquiz anchal cjuñznuča wejt judfo wajtchiz žoñinacžquiz. ³Wejt judfo žoñinacaqui Jesucristuž partiquiz cjiskattasaž niiqui, wejrqui Jesucristužquiztan t'akžtacama cjis pectasača. Nižaza wejrqui ninacž laycu infiernuquin castictacama cjitasacha. Ninacaqui wejt parti žoñinacača. ⁴Israel majchmaatinacquiztan tjonchiž cjen, ninacaqui Yooz illzta žoñinacača. Yoozqui judfo žoñinacžquiz persun honora tjeeziča. Nižaza Yoozqui

judfo žoninacžtan acuerdunacquiz luzziča. Nižaza Yoozqui Moisesquiz lii tjaachiča ninacžtajapa. Nižaza Yoozqui, jaknužt niizquiz sirwiz waquizičhaja, jalla nii cuzturumpinaca ninacžquiz tjaachiča. Nižaza tuqui timpuquiz Yoozqui ninacžquiz takunaca tjaachiča, jasztanaqui tsjii Liwriiñi tjonaquičha, nii. ⁵Učhum judfo žoninacž tuquita atchi ejpnacaqui Yooziž illztatača. Jaziqui učhum judfo žoninacž majchmaatinacquiztan tjonñitača Cristuqui. Nekztan žoñž curpuchiz cjissiča. Cristučha tjapa mantiñi Yoozpachaqui. Nižaza wiñaya honorchiz cjila. Nužoj cjila. Amén.

⁶Tjapa Israel cjita tuquita ejpž majchmaatinacaqui anača ultim lijitum Israel wajtchiz žoninaca, nižaza anača Yooz wajtchiz žoninaca. Tjapa judfo žoninacami ana Yooz maatinacaž cjenami, Yooz takuqui cumplissiča. ⁷Nižaza tjapa Abrahamž majchmaatinacaqui anača ultim lijitum Abrahamž familiaqui. Cjijrta Yooz takuqui Abrahamž puntuquiztan tuž cjiča: “Am ultim majchmaatinacaqui am majch Isaacžquiztan okaquičha”. ⁸⁻⁹Jaziqui wejrqui cjiwčha, tjapa Abrahamžquiztan ojknii majchmaatinacaqui anača ultimu Yooz maatinaca, nii. Yoozqui Abrahamžquiz taku tjaachiča, tuž cjican: “Weriž chiita timpuquiz quejpžcača, wejt taku cumplizjapa. Jalla nii weriž quejpžquizcama am Sara cjiti tjunqui tsjii majch mataquičha”. Nekztan Abrahamqui nii taku catokchiča. Nižaza Yoozqui tjapa niiz taku catokñi žoninacžquiz nayčha, ninacaqui ultim lijituma Abrahamž majchmaatinacača, nii.

¹⁰Tsjilla cjesača nii puntuquiztan. Učhum Isaac tuquita atchi ejpqui

Rebeca cjiti tjunchizza. Nii lucutiñiqui pucultan majchnacchiztača.

¹¹⁻¹³Nii pucultan ocjalaž ima matan, nižaza ima zuma ana zuma paan, Yoozqui Rebecaquiz cjichiča, tuž cjican: “Am jilir majchqui niiz majchmaatinacžtanpacha niiz lajkžquiz piyunanaca cjequičha niiz lajkž majchmaatinacžquizpacha”. Nižaza cjijrta Yooz takuqui tuž cjiča: “Jacob pecchinča. Esau ana pecchinča”. Jaknužt Yooz pinsitčhaja, jalla nuž illziča. Paatanacquiztan jama ana illziča Yoozqui. Pero niiz pectacama illziča, nižaza kjawziča niiz partiquiz cjisjapa.

¹⁴Jalla nii puntuquiztan čkjaž iya cjequejo? ¿Yooz ana lijituma paajo? Anaž cjesača. Yoozqui lijituma panž paača. ¹⁵Yoozqui Moisesquiz cjichiča, tuž cjican: “Wejt munañpacama wejt okžni kuz tjeeznuča, nižaza wejt munañpacama favora paaznuča”. ¹⁶Ana žoñž munañpacama, nižaza ana žoñž langžtacama Yoozqui okža. Pero Yoozqui persun kuz munañpacama okža. ¹⁷Cjijrta Yooz takuqui tuž cjiča: Yoozqui Egipto nación chawc jiliržquiz cjichiča: “Wejrqui am utchinča chawc jiliri cjisjapa. Jalla nuž am utchinča, am quintra wejt azi tjeezjapa, nižaza tjapa tii žoninacžquiz weriž paata quintu mazta cjisjapa”. Jalla nuž cjichiča Yoozqui. ¹⁸Yoozqui persun kuz munañpacama okža, nižaza persun kuz munañpacama žoninacž kuz chojruzakaz cjiskatča. Jalla nižta kjanapachača.

¹⁹Cunamit tsjiiqui cječhani, tuž cjican:

—Jalla nižta cjen, čkjažti quiztan Yoozqui žoninacž ujquiztan casticaquejo? ¿Jec žoñit Yooz pinsita quintra kamasajo?

²⁰ Jalla nižta chiiñizquiz pewcznača, ħject amjo Yooz quintrā ch'aazjapajo? ħTsjii ojchqui niiz paañizquiz chuchasajo, “ħKjažtiquiztan wejr nižta paajo?” cĳicanajo? ²¹ Tsjii ojch paañiqui ħjulumi paasača ljocquiztanaqui. Ljocquiztan paasača tsjii anča c'achja ojchlla pĳijztanacžquiz joojoota cĳisjapa. Nižaza ana zuma cheechi ojch paasača, zapuru joojoota cĳisjapa.

²² Jalla nižta iratača Yoozqui. Yoozqui tsjii žoñinaca utchiča, casticta cĳisjapa. Jalla nuž utchiča, niiz azi tjeezjapa, nižaza niiz uj quintrā žawjz tjeezjapa. Jalla nuž tjeezñi peccanami Yoozqui pasinziz kuztan nii ana wal žoñinaca awantiča, casticz tjuñicama. ²³ Nižaza Yoozqui yekjap žoñinaca utchiča, niiz okžta cĳisjapa. Tuquitanpacha nii žoñinaca tjacziča, arajpachquin zuma honorchiz cĳisjapa. Nižaza Yoozqui nii žoñinacžtan okžñi kuztan žejlča, niiz juc'ant okžñi kuz tjeezjapa. ²⁴ Učhum zakaz Yoozqui kjawziča, niiz okžta žoñinaca cĳisjapa. Judío wajtchiz žoñinacami ana judío wajtchiz žoñinacami, tjapa učhumqui Yooz okžta žoñinacčhumča. ²⁵ Jalla nii puntuzakaz Yoozqui Oseas cĳijrta liwruquiz tuž cĳiča:

“Ana Yooziž illzta žoñinacaqui
Yooziž illzta žoñinaca cjequiča.
Nižaza tuqui ana pecta
žoñinacaqui anziqiu Yooziž
pecta cjequiča”.

²⁶ Nižaza tuquiqui judío žoñinacaqui cĳiçiča: “Ančhucča anaž Yooz wajtchiz žoñinacaqui”. Pero tii timpuquiz nii iñarta žoñinacaqui “zejtni Yooz maatinacaž cjequiča”.

²⁷ Israel žoñinacž puntuquiztan Isafas profetaqui tuž cĳiçiča: “Israelž majchmaatinacaqui anča tama želaquiča, kot at pĳilažtakaz, jalla nižta miraquiča. Jalla nuž mirchi

cjenami, tsjii kjaž žoñinacakaz liwriitaž cjequiča. ²⁸ Yooz Jiliriqui tii muntuquiz žejlñi žoñinacžquiz niiz chiita taku cumplaquiča, panž apura cumplaquiča”. ²⁹ Jalla nii puntuzakaz Isafas profetaqui mazinchiča tuž cĳican:

“Walja azziz Yooz Jiliriqui tsjii učhum majchmaatinaca ana liwriitasaz niiqui, tjappacha ticztasača Sodoma wajtchiz žoñinacažtakaz, nižaza Gomorra wajtchiz žoñinacažtakaz”.

JUDIO ŽOÑINACAQUI UJQUIZ TJOJTSA

³⁰ ħKjaž cjequejo nekztanajo? Tuquiqui ana judío žoñinacaqui ana importichiča Yooz yujcquiz ana ujchiz cĳisjapa. Jaziqui Jesucristužquin kuz tjaachiž cĳen Yooz yujcquiz ana ujchiz cĳissiča. ³¹ Nižaza judío žoñinacaqui Moisés lii jaru kamz pecatča, Yooz yujcquiz ana ujchiz cĳisjapa. Pero nii lii jaru ana zumpacha kami atchiča. ³² ħKjažtiquiztan Yooz yujcquiz ana ujchiz cĳisñi atatjo? Ninaca persunpacha lii jaru kamtiquiztan Yooz yujcquiz zuma cĳis pecchiča. Pero ana atchiča. Nižaza nii lii jaru kamz peccan, juc'ant ujchiz cĳissiča, Jesucristužquin ana kuz tjaachiž cĳen. Jaknužt tsjii mazquiz tejšcu tjojtšaja, jalla nižta irata Jesucristužquiztan ujquiz tjojtsiča. ³³ Jalla nužpacha cĳijrta Yooz takuqui cĳiča:

“Žoñinaca nonžna; wejrqui Siön cĳita wajtquiz tsjii utča. Jalla niizquiztan žoñinaca ujquiz tjojtsnaquiča. Tsjii maztakaz niizquiztan žoñinaca t'eznaquiča. Pero jakziltat niizquiz kuz tjaachaja, jalla niiqui ana inakaz kuz tjaaquiča. Ana incallta cjequiča”.

10 ¹Jilanaca, cullaquinaca, judío žoñinaca liwriitaj cjila, jalla nužuča weriž kuzquiz pectaqui. Nižaza jalla nužuča weriž Yoozquin mayiztaqui. ²Ninacž puntuquiztan wejrqui ticlarača, ninacaqui Yooz sirwiz pecča, nii. Pero Yooz sirwiz puntu ana zuma intintazza. ³Jaknužt Yoozqui žoñinaca ana ujšiz, nižaza zuma cjiskatčhaja, jalla nii Yooz pinsita ana zizza. Ninacaqui persun kuzquiz pinsitacamakaz Yooz yujcquiz zuma cjis pecča. Jalla nižtiquiztan Yooz pinsitiquiz ana importičiča; nižaza Yooz taku ana nonža. ⁴Jesucristuqui Moisés lii nužquiz apatatskatchiča. Jaziqui jakziltat Jesucristužquiz kuz tjaačhaja, jalla niikaz Yooz yujcquiz zuma cjisnaquiča, ana ujšiz.

⁵Yooz yujcquiz zuma cjis puntuquiztan Moisesqui tuž cjiirčiča: “Jakziltat wejt lii jaru kamčhaja, jalla niiqui Yooztan kamaquiča, lii jaru kamčiž cjen”. Pero žoñinacaqui nuž kami anapan atča. ⁶Jaziqui Jesucristužquiz kuz tjaačiž cjenkaz Yooz yujcquiz zuma cjesača. Jalla nii puntuquiztan tužuča. Ančuca kuzquiz ana pinsaquiča, tuž cjican: “¿Ject arajpacha yawasay?” (Jalla nuž cjican, Jesucristo chjiwkwatz pecča.) Ana čjul žoñimi nižta paasača. ⁷Nižaza ančuca kuzquiz ana pinsaquiča, tuž cjican: “¿Ject ticzi žoñinacžquin okaqui?” (Jalla nuž cjican, Jesucristo ticziquiztan jacatatskatz pecča.) Ana čjul žoñimi nižta paasača. ⁸Pero čjul žoñimi Yoozquin kuz tjaačiž cjen Yooz yujcquiz zuma cjisnasača. Yooz yujcquiz zuma cjisqui jalla tužuča. Liwriiñi taku ančhucalta žejlča, Yoozquin kuzziz cjisjapa. Nii taku ančuca atžtan parlasača, nižaza ančuca kuztan catokasača.

Jalla nii liwriiñi takuqui tužuča: Jesucristužquiz kuz tjaaquiž niiqui, liwriita cjequiča, nii. Jalla niipacha wejrnacqui paljayuča. ⁹Ančhucqui ticlarstanča, Jiliripanča Jesucristuqui, cjicanaqui. Nižaza ančuca kuzquiz criistanča, Yoozqui Jesucristo ticziquiztan jacatatchiča, jalla nii. Jalla nekztan liwriita cjequiča. ¹⁰Žoñinacaqui tjapa kuztan criistanča, nekztan Yooz yujcquiz zuma cjequiča, ana ujšiz. Nižaza persun tawkžtan “Jesucristužquiz kuz tjaa-uča” cjican ticlarstanča, nekztan liwriita cjequiča.

¹¹Cjiirta Yooz takuqui tuž cjiča: “Jakziltat Yoozquin kuz tjaačhaja, jalla niiqui ana inakaz kuz tjaaquiča”. ¹²Judío žoñinacžtanami yekja wajtchiz žoñinacžtanami Yooz yujcquiziqui tsjii parijukazza. Yooz Jiliriča tjapa žoñinacžta Jiliriqui. Jakziltat liwriita cjisjapa Yoozquiz mayizičhaja, jalla nižquiz Yoozqui okznaquiča; nižaza liwriyaquiča. ¹³Jalla nužpacha cjiirta Yooz takuqui cjiča: “Jakziltat Yooz Jiliržquiz mayizičhaja, jalla niiqui liwriita cjequiča”. ¹⁴Pero žoñinacaqui Yoozquin ana criyaquiž niiqui, čkjažt nii žoñinacaqui Yoozquin mayizasajo? Nižaza Yooz puntuquiztan ana nonzitažlaj niiqui, čkjažt Yoozquiz criyasajo? Nižaza Yooz puntu paljayñi žoñi ana želaquiž niiqui, čkjažt nonžni cjesajo? ¹⁵Nižaza Yooz puntu paljayñi žoñinaca ana cuchanžquitažlaj niiqui, čkjažt Yooz puntu paljayta cjesajo? Cjiirta Yooz takuqui tuž cjiča: “Ancha zumača Yooz puntu paljayñi žoñinacaqui. Paljayta Yooz taku catokžcu, Yooztan žoñinacžtan wali cjiskatasača”.

¹⁶Pero wacchi žoñinacaqui paljayta Yooz taku ana juyzu paača. Jalla nužupan Isaiasqui cjichiča: “Yooz

Jiliri, ¿ject wejrnacaž paljayta takunaca criiyo? Tsiji kjažukazza criichiqui”. ¹⁷ Jaziqui Jesucristuž puntu paljaytažlaja, nii puntu nonžta cjesača. Nižaza Jesucristuž puntu nonžcu, žoñinacaqui niizquin kuz tjaasača.

¹⁸ Wejr pewcznuča, ¿Judío žoñinacaqui ana nonzejo? Nonzipanča. Yooz takuqui cjiča:

“Tjapa kjutni tii yokchiz žoñinacžquiziqui nii liwriiñi taku mazmaztača. Nižaza tjapa tii muntuquiz žejlñi žoñinacaqui nii taku nonža”.

¹⁹ Tsijižtan wilta pewcznuča, ¿Israel wajtchiz žoñinacaqui ana intintazzikaya? Tuquiqui judío žoñinacž puntuquiztan Moisesqui cjichiča:

“Yoozqui ančhucaquiz iñiziskataquiča, yekja wajtchiz žoñinacžquiztan. Nižaza Yoozqui ančhucaquiz žawjkataquiča tuquita ana Yooz pajni wajtchiz žoñinacžquiztan”.

²⁰ Nekztanaqui Isaiasqui ana ekskuc, tuž čiichiča:

“Ana werar Yooz pecñinacaqui ultimquiziqui Yooz pajchiča. Nižaza Yoozqui persunpacha tjeeziča tuquita ana niizquiz pecñinacžquiz”.

²¹ Yooz Ejpqui Israel wajtchiz žoñinacž puntuquiztan tuž cjiča:

“Zita zita wejrqui ančhuc kjawznatuča wejtquin tjonajo. Ančhuczi anaž wejt kjawža cazza, antiz wejt quintrakazza”.

CRICHI JUDIO ŽOÑINACA ŽEJLČHA

11 ¹ Jalla nižtiquiztan wejrqui pewcznuča, ¿Yoozqui niiz tuquita illzta žoñinaca chjatkatjo? Anapanž cjesača. Wejrpacha

Israel wajtchiztča, Abrahamž majchmaatitča, nižaza Benjaminž parti žoñtča. ² Tuquitanpacha Yoozqui Israel žoñinaca illziča. Jalla nižtiquiztan anaž chjatkatasača. ¿Jalla Elías puntuquiztan ana cjuñjo? Elías puntuquiztan cijirta Yooz takuqui tuž cjiča: Eliasqui Israel žoñinacž ujnaca Yoozquiz tjeeziča, tuž cjan: ³ “Yooz Jiliri, ninacaqui amiž cuchanžquita profetanaca conchiča. Nižaza am sirwiz altaranaca pajlchiča. Wejrqui am sirwiñi zinalla želuča. Ninacaqui wejr zakaz conz pecča”. Jalla nuž cjichiča Eliasqui. ⁴ Nekztan Yoozqui Eliasquiz tuž kjaaziča: “Wejtajapa pakallawk warank žoñinaca čhjetzinča. Ninacaqui Baal cjeta žoñiž paata yooz yujcquiz anapan quillziča”. ⁵ Jalla nižta irata tii timpuquiz zakaz tsiji kjaž judío žoñinacaqui Yooz partiquiz žejlča. Yoozqui ninacžquiz okžcu, illziča. ⁶ Nii criichi judío žoñinacaqui Yooziž okziž cjenkaz illztača. Jalla nižtiquiztan ana ninacaž kamtiquiztan illztača. Ninacaž kamtiquiztan illzta cjitasaž niiqui, Yooz okzqui inakaz cjitasača.

⁷ ¿Jazic kjaž cji? Israel wajtchiz žoñinacaqui ujquiztan liwriita cjis pecatča. Pero ana liwriitatača. Yooziž illztanacaqui ninaca alajakaz liwriitatača. Parti Israel žoñinaczi chojru kuzziz cjissiča. ⁸ Jalla nii chojru kuzziz žoñinacž puntuquiztan cijirta Yooz takuqui tuž cjiča:

“Yoozqui Israel žoñinacžquiz niiz puntu ana intintiñi kuzziz cjskatchiča. Jalla nižtiquiztan ninacaqui Yooz puntu chercanpacha ana chernižtakaz cjskatchiča, nižaza Yooz puntu nonzcanpacha ana nonžnižtakaz cjskatchiča.

Anzta tii timpucamaž nižta žejlča”.

⁹Nižaza Davidqui Yooz tawkw liwruquiz tuž cjiyrchiča:

“Yoozquin ana kuzziz žoñinaca žejlča. Yooziž tjaatanacaqui ninacžquiz ujquiz tjojtskatla. Tsjii trampažtakaz cjila, ujquiz tjojtskatzjapa. Nižaza ninaca t'ezinla, ninacž uj paatiquiztan jama casticta cjisjapa. ¹⁰Zur žoñinacžtakaz žejlcan Yooz puntu ana cherñi cjila. Nižaza ninacž tajqui chutunzižtakaz cjila, ana walinacž tjonchiž cjen”.

YEKJA WAJTCHIZ ŽOÑINACŽ PUNTU

¹¹Jalla nižtiquiztan wejrqui pewcznuča, Israel wajtchiz žoñinacaqui ujquiz tjojtsiž cjen, žwiñaya chjatkatta cjesajo? Anapanž cjesača. Israel wajtchiz žoñinacž liwriñi tawkwiz ana juyzu paachiž cjen, nii liwriñi takuqui yekja wajtchiz žoñinacžquiz paljayača, Israel žoñinacžquiz p'ekinchayzjapa, Yoozquin kuz tjaajo. ¹²Israel žoñinacž liwriñi taku ana juyzu paachiž cjen parti žoñinacžtajapa zuma cjissiča. Nižaza ninacž Yoozquiztan jaytitiqiztan yekja wajtchiz žoñinacžtajapa wali cjissiča. Jalla nižtiquiztan Israel žoñinaca wila Yooz partiquiz cjisnan tsjan juc'ant zumaž cjisnaquiča yekja wajtchiz žoñinacžtajapa.

¹³Anziqui ančhuc yekja wajtchiz žoñinacžquiz chiyuča. Wejrqui yekja wajtchiz žoñinacžquiz cuchanžquita apostoltča. Jalla nižtiquiztan wejt apóstol kamaña anchal importayuča, ¹⁴wejt judío

sarchiz žoñinaca p'ekinchayzjapa, nižaza tsjii kjažu liwriita cjisjapa.

¹⁵Judío žoñinacž chjatkattaž cjen yekja wajtchiz žoñinacaqui pertunta cjissiča, Yooztan wali cjisjapa. Jalla nižtiquiztan nii judío žoñinacž wila Yooz partiquiz risiwa cjis cjen, žoñinacaqui ticziqiztan jacatatchi cjisnaquiča. ¹⁶Judío žoñinacž tuqita atchi ejpnacaqui Yooz partiquiz želatča. Jalla nižtiquiztan tsjii tjonñi timpuquiz judío žoñinacaqui Yooz partiquiz wila cjisnaquiča. Jaknužt primir paata t'antaqui zumažlaja, jalla nekztan tjapa nii t'anti mazaqui zuma zakazza. Nižaza tsjii munti sep'auqui zumažlaj niiqui, nii tsijtñi muntiqui zuma zakazza.

¹⁷Tsjii judío žoñinacaqui munti itzanacžtakaz ts'ojrtača. Nižaza ančhuc yekja wajtchiz žoñinacaqui tsjii ana pecta munti itzažtakazza. Pero ančhucqui judío žoñinacž cjenpacha apjattača, nii zuma muntiž cjen wali zakaz cjejajo. Nii zuma muntiqui Yooz partiča. ¹⁸Ančhucqui jalla nuž apjattiquiztan, anaž judío žoñinaca iñaraquiča. Jakziltat iñaračhaja, jalla niiqui tuž cjuñz waquiziča, ančhucqui nii sep'až cjen žetiñčhucča. Ana ančucaž cjen nii sep'a žejtča. Nii sep'ača judío žoñinacaqui. Cristuča tsjii judío žoñiqui. Jalla niiž cjen ančhucqui ew žeti tanzinčhucča.

¹⁹Yekjapanacaqui cunamit cječani, “Nii itsanacaqui ts'ojrtača wejnaca apjatža cjisjapa”. ²⁰Razunaž niiqui. Ana Yoozquin kuz tjaachiž cjen judío žoñinacaqui chjatkattača. Ančhuczi Yoozquin kuz tjaachiž cjen jalla nii alajakaz Yooz partiquiz žejlča. Jalla nižtiquiztan anača mitarazi kuzziz cjeella. Antiz humilde kuzziz cjee, Yooz rispitan. ²¹Yoozqui ana kuz tjaani judío žoñinacžjapa quintr

cjissizlaj niiqui, ančhucajapa zakaz quintra cjisnaquiča ana niizquiz kuzzizlaj niiqui. ²²Yoozza okznimi nižaza casticñimi, jalla niiz tantiya. Yoozquiztan zarakni žoñinacžjapa casticñipanča. Nižaza niizquin kuz tjaañinacžjapa okznipanča. Ančhucqui tira Yoozquin kuzzizlaj niiqui, nekztan Yoozqui ančhuc tira okznaquiča. Ančhucqui ana tira Yoozquin kuzzizlaj niiqui, nekztan Yoozqui ančhucquiz zakaz chjatkataquiča. ²³Nii chjatkatta judío žoñinacaqui wilta Yoozquin kuz tjaauiz niiqui, wilta Yoozqui ninaca ricujaquiča. Yoozqui ricujzmi atča, Yooz partiquiz cjisjapa. ²⁴Ančhucqui yekja wajtchiz žoñinacača, ana pecta munti itzanacažtakaz. Ana Yooz partiquiz želan Yoozqui ančhuc niiz partiquiz apjatchiča, yekja wajtchiz žoñinacaž cjenami. Jalla niža watan, judío žoñinacaqui Yooz partiquiz wilta apjatžqui tsjan pjasilača, tuquiqui Yooz partiquiz žejlchiž cjen.

JUDIO ŽOÑINACAQUI YOOZQUIN KUZ TJAAQUIČA

²⁵Jilanaca, cullaquinaca, tsjii tuquita ana zizta taku ančhucquiz zizkatz pecuča, ana mitaraz kuzziz cjisjapa, “Wejrnacqui ziziñ žoñtča” cjicanaqui. Jalla tuž zizkatz pecuča: Yoozqui yekja wajtchiz žoñinacžquiz niiz partiquiz cjiskatz pecča. Jakziltanacžquiz Yoozqui niiz partiquiz luzkatz pecčhaja, jalla ninacaqui luzaquiča. Tjapa nii Yooziž pecta žoñinaca Yooz partiquiz luzcama, jalla niicama Israel žoñinacaqui chojru ana intintiñi kuzziz cjequiča. ²⁶Jalla nekztanaqui tjapa nii timpuquiz žejlñi Israel žoñinacaqui liwriita cjequiča. Jalla nuž cijirta Yooz takuqui cjiča:

“Sión wajtquiztan tsjii

Liwriiñiqui tjonaquiča. Jacobž

majchmaatinacquiztan ana zum kamañanaca jaytiskataquiča.

²⁷Jalla nekztanaqui wejrqui ninacžtan compromitača, ninacž ujnaca pertunaca, nii”.

²⁸Tii timpuquiziqui Israel

žoñinacaqui Yooz liwriiñi taw k quintrača, nižaza Yooz quintrača, ančhucalta wali cjisjapa. Jalla ninaca Yooz quintraž cjenami Yoozqui ninacžtan munaziča, ninacž tuquita atchi ejpnaca illziž cjen. ²⁹Yoozqui tjaacanpacha anaž niiz tjaataqui kjañasača. Nižaza Yoozqui illžcupacha, ana chjatkatasacha. ³⁰Tuquiqui ančhucqui Yooz ana cazziñčhucča. Anziqui ančhucqui Yooziž pertuntača, ninacaž ana Yooz cazziž cjen. ³¹Tii timpuquiziqui Israel žoñinacaqui Yooz ana cazza. Jalla nuž cjenami tii jarquin ninacaqui Yooziž pertuntaž cjequiča, jaknužt ančhucqui pertunta cjistčhaja, jalla niža. Jalla niža Yoozqui niiz okznimi kuz tjeeznaquiča. ³²Yoozqui tsjii pariju tjapa žoñinacž ujnaca tjeeziča, niizquiz ana caza, jalla nii. Jalla nuž tjeeziča tjapa žoñinacžquiz tsjii pariju niiz okznimi kuz tjeezjapa.

³³¡Ancha juc'anti zumača Yoozqui! Ancha zuma pinsitanacchizza. Nižaza Yoozqui tjapa intintazza. Nižaza Yooziž pinsitanaca anaž jecmi zuma intintasača. Yooz pjalan anaž jecmi niizquiz mitisasača. ³⁴¿Ject Yooz Jilirž pinsitanaca intintasajo? ¿Ject Yooz Jiliržquiz tjaajnasajo? ³⁵¿Ject Yooz Jiliržquiz ayñi cjisjapa tjaasajo? Anaž jecmi. ³⁶Tjapa Yoozquiztan tjonča. Nižaza tjapa niiz cjen žejlča. Nižaza tjapa niiztacamača. Yoozqui wiñaya honorchiz cjila. Jalla nužoj cjila. Amén.

YOOZ KUZCAMA KAMZ PUNTU

12 ¹Jilanaca, cullaquinaca, Yooz ančhuc okziž cjen ančhucquiz

chiižinuča, ančuca persun curpu Yoozquin tjaa, tsjii žejtni wilanažtakaz. Ančuca persun curpu Yooztajapakaz cjee, ana zinta uj paacan. Nuž cjen Yoozqui cuntintuž cjequiča. Jalla nižtača Yooz ultim litituma sirwizqui.

²Jaknužt tii muntuquiz ana criichi žoñinaca kamčhaja, jalla nižta ančhucqui ana kama. Antiz ančhucaz pinsitanacaž campiita cjee, Yooz pinsitanacaž irata cjeয়ো. Tjapa ančuca kamaña zuma cjee. Jalla nekztan Yooz kuz zizñiž cjisnaquiča. Yooz kuzqui zumapanča, nižaza Yooz kuzcama kamzqui Yoozquiz cuntintu cjiskatča, nižaza Yooz kuzcama kamcan ančhucqui zumapan cjequiča.

³Yoozqui wejr okžcu apóstol puestuquiz wejr utchiča. Jalla nižtiquiztan tjapa ančucaquiz chiižinuča, persun puntuquiztan anača pinzizqui, “Wejrqui tsjan zumtča” cjicanaqui. Jalla nuž pinziz anaž waquiziča. Antiz zapa mayni persun kamañ puntuquiztan zuma razunchiz pinziz waquiziča. Cjuñzna, Yoozqui zapa maynižquiz tsjii kamaña tjaachiča, Yoozquin kuzziz cjitiquiztan jama. Jaziqui ana mitarazi kuzziz cjee. ⁴Tsjii curpuquiz wacchi partinaca žejlča. Punta punta žejlča, cherñi, nonzñi, lanzñi jalla nižta.

⁵Jalla nižta irata Cristuž partiquiz žejlča. Učhumqui tamaž cjen tsjii pariju Cristuž partiquizkaz žejlča, tsjii curpužtakazza. Cristuž partiquiz žejlcan, učhumnacaqui tsjii kuzziz uniru žejlča.

⁶Yoozqui zapa maynižquiz yekja yekja kamaña tjaachiča, jaknužt munčhaja, jalla nuž. Jalla nii tjaata kamañ jaru kama. Yooziž tjaata taku parliñi kamañchižlaj niiqui, jalla nii kamañquiz zuma kama, Yoozquiz tjapa kuzquiztan jama. ⁷Iclizquiz

yanapñi kamañchižlaj niiqui, zuma yanapz waquiziča. Yooz puntu tjaajiñi kamañchižlaj niiqui, zumapan tjaajinz waquiziča. ⁸Yoozquin kamzjapa p'ekinchayñi kamañchižlaj niiqui, zumapan p'ekinchayz waquiziča. Yoozquin cusasanaca tjaañi kamañchižlaj niiqui, tjapa kuztan tjaaz waquiziča. Icliza irpiñi kamañchižlaj niiqui, zumapan irpiz waquiziča. T'akjir žoñinacžquin okžñi kamañchižlaj niiqui, zuma cuntintu yanapz waquiziča.

ZUMAPAN KAMAQUIČHA

⁹Tjapa kuztan porapat lititum zuma munaziñi cjee. Ana zuma paaznaca anapan peca. Pero zuma paaznaca tjapa kuztanpan paa. ¹⁰Porapat oksaspanča. Zuma kuztan parti hermanonacžquiz rispitaquiča, anača tsjiiž rispitskaz tjewzqui.

¹¹Ana jayrazñi kuzziz cjee, pero c'unchi kuzziz cjee Yooz sirwizjapa. Nižaza tjapa kuztanpan Yooz sirwa.

¹²Arajpach zumanaca tjewžcan, cuntintuž kama. Llaquinacaž tjonanami pasinziz kuzziz kama. Yoozquin parlicanpan žela.

¹³Criichi žoñinacaž t'akjiri želan, panž yanapa. Tjonzñinaca tjonan, panž kjawžna.

¹⁴Ančuca quintr žoñinacžtajapa Yoozquiztan mayižinaquiča, ninaca zuma cjisjapa. Anaž quintr chiičiyaquiča. Antiz mayižinaquiča.

¹⁵Cuntintu žejlñi žoñinacžtan cuntintuza cjee. Kaañi žoñinacžtan chicazaž kaazna.

¹⁶Porapat zuma munazican kama. Anača mitarazi kuzziz tucquin cjis pecsqui. Pero humilde kuzziz wirquin cjian cuntintuž cjee. Anača “Wejrqui zuma ziziñ žoñtča” cjee.

¹⁷Tsjiiqui ančhuca quintr paachiž cjen, ančhucqui anača nižtapacha quintr tjepunzqui. Zumapanž paazjapa tjapa kuz tjaa. ¹⁸Nižaza ančhucqui tjapa žoñinacžtan zuma kama, attacama. ¹⁹Pecta jilanaca, cullaquinaca, ančhucpacha anača quintr tanassa. Yoozpachaž ančhuca quintranaca casticaquiča. Jalla nuž cjiřta Yooz takuqui cjiča: “Yooz Jiliriqui tuž cjiča, ‘Wejrtča quintr žoñinaca castiquiñtqui. Wejr casticača’ ”. ²⁰Nižaza Yooz takuqui cjiča: “Ančhuca quintr žoñinacaž čjjeri eecziž cjen, čjjeri ona. Nižaza kjaz kjara passiž cjen, kjaz ona. Jalla nuž paažcuqui nii žoñinacžquiz azkataquiča”. ²¹Tsjii žoñiqui ančhuca quintr paasača. Ančhuczi ana nižtapacha tjepna. Pero nii quintr žoñžquiz zumžtanž paacan jalla nuž atipa.

13 ¹Tjapa žoñinacaqui gobiernuž mantitanaca caz waquiziča. Yoozqui mantiz poder tjaača tiižquizimi niižquizimi. Yoozqui jilirinacžquiz poder tjaachiča mantizjapa. ²Jalla nižtiquiztan jakziltat jilirž quintr cječhaja, jalla niiqui Yooziž utžta žoñž quintrča. Nižaza nii quintr žoñinacaqui casticta cjequiča. ³Zuma paañi žoñinacaqui anaž jilirinacžquiz eksnasača. Antiz ana zuma paañi žoñinacaqui jilirinacžquiz eksnasača. ¿Ančhucqui jilirinacžquiz ana eksan kamz pecya? Zumapan kama. Nekztan nii jilirinacaqui ančhucaquiz walikaz cjican cjequiča. ⁴Jilirinacaqui zizcumi ana zizcumi Yooz sirwiča, ančhucalta wali žejlzjapa. Pero ančhucqui ana zuma paaquiž niiqui, eksnasača. Jilirinacaqui casticz poderchizza, anača inakaz nii mantiz puestu tanža. Ninacaqui Yooz sirwiča, nižaza

Yooz cuntiquiztan ana zuma paañi žoñinaca casticča. ⁵Jalla nižtiquiztan jilirinacž mantuquiz cjee, Yooz ana casticta cjisjapa, nižaza jilirinacžquiz tjapa kuztan cazpanča. ⁶Jalla nijapa zakaz ančhucqui impuestonaca pjojcz waquiziča. Mantiñi gobiernuqui Yooz sirwican impuestonaca packatča.

⁷Tjapa jilirinacžtan zumapan cjee. Tsjii tasa tjaaslaž niiqui, panž tjaa. Tsjii impuesto pacz waquiziž niiqui, panž paca. Jakziltižquiz rispitz waquiziž niiqui, niižquiz panž respita. Jakziltižquiz honora waytižinz waquiziž niiqui, niižquiz honora waytižina. ⁸Ana jecžtanami kajchiz žela. Pero porapat zuma munaziz waquiziča. Jakziltat žoñinacžtan zuma munazačhaja, jalla niiqui Yooz mantitanacaž cumpliča. ⁹Yooz mantita ortinanacaqui tuž cjiča: “Anača adulteriuquiz žejlzqui. Anača žoñi conzqui. Anača tjañi zaazqui. Anača toscara chiizqui. Anača yekja žoñžta cusasa zmazqui”. Jalla nii mantita ortinanacami nižaza tjapa mantitanacami cumplitaž cjequiča, tuž kamcan: “Jaknužta am persun kuztan zuma munazičhaja, jalla nuž žoñinacžtan zuma munaziz waquiziča”. ¹⁰Jakziltat nižta zuma munazičhaja, jalla niiqui žoñinacž quintr anapan paaquiča. Jalla nižtiquiztan zuma munazican Yooz mantita ortinanaca cumpliča.

¹¹Jalla nuž kamcan, tii timpu naya. Nii nii žela. Tuquiqui Jesucristužquiz kuz tjaachinčhumča. Anziqui ultimu liwriiz tjuñiqui tsjan žcatžinzquiča. ¹²Tii kamz timpuqi waj tucuzinznaquiča. Nižaza Jesucristuž tjonz tjuñi žcatžinzquiča. Jalla nižtiquiztan ana zuma paaz kamañquiztan zarakzpan waquiziča. Zuma paaz kamañchiz

kamz waquiziča, tsjii zuma armichiz zultatužtakaz. ¹³Zuma kamcan zuma žoñiža ojklaya, kjanquiztakaz ojklaycan. Anaž pijjstanaca paacan, kama. Nižaza ana licchi kama. Nižaza ana adulteriuquiz žejlcan kama. Nižaza ana zuma kamañchiz ana kama. Nižaza žoñinacžtan ch'aascan ana kama. Nižaza žoñinacžtan iñisican ana kama. ¹⁴Tsjii zuma armichiz zultatužtakaz Jesucristo Jilirž kuzcama kama. Uj paaz pecñi kuz pinsitanacžquiz ana kuz tjaa, nii jaru kamzjapa.

**CRIICHI ŽOÑINACAQUI PUNTA
PUNTA PINSACUIČHA**

14 ¹Tsjii llajlli kuzziz criichi žoñiqui želan, niižquiz zuma risiwaquičha, pero niižtan ana payznakkatñi puntunaca ch'aas waquiziča. ²Tsjii criichi žoñiqui tantiiča, čhjulumiz lulasača, nii. Yekja criichi žoñiqui tantiiča, chjizwi ana lulasača, nii. ³Nii čhjulumi lujlñi žoñiqui nii yekja žoñžquiz ana iñarz waquiziča. Nižaza nii ana chjizwi lujlñi žoñiqui nii čhjulumi lujlñi žoñžquiz anaž uj tjojtunz waquiziča. Yoozqui nii čhjulumi lujlñiqui risiwchiča, niižquiz kuzziz cjen. ⁴Jalla nižtiquiztan nii Yooz sirwiñi žoñžquiz ana uj tjojtunz waquiziča. Niiž persun Yooz Patrunaqui niiž uj jwesnaquičha, ana zuma paachižlaj niiqui. Yoozquiz kuzziz cjanaqui ultimquiziqui walikaz cjesača. Yooz Patrunaqui nii žoñžquiz wali cjiskatz atča niiž aztanaqui. ⁵Tsjii puntužtan chiižinuča. Tsjii criichi žoñiqui “Tsjii tjuñinacaqui chawc tjuñinacača” cjiča. Yekja criichi žoñizti cjiča, “Tsjii parijuča tjuñinacaqui”. Zapa mayni persun kuzquiz zumpacha tantiižcuqui, jalla

nii tantiita jaru kama. ⁶Tsjii criichi žoñiqui tsjii chawc tjuñi wartaquiz niiqui, Yooz honora waytita cjisjapa wartiyaquičha. Tsjii criichi žoñizti nii tjuñi ana wartčhaja, jalla niiqui Yooz honora waytita cjisjapa niža ana wartča. Nižaza tsjii čhjulumi lujlñi žoñiqui Yoozquin gracias cjižcu jalla nuž lulaquiz niiqui, Yooz honora waytita cjisjapa lulaquičha. Nižaza yekja criichi žoñiqui ana chjizwi lulaquiz niiqui, Yooz honora waytita cjisjapa ana lujlča. Nižaza ana lujlčhiž cjen niiqui Yoozquin gracias cjican chiiž waquiziča.

⁷Anaž žoñinacaqui inakaz kamča, nižaza anaž inakaz ticža. ⁸Učhumqui tii muntuquiz kamcan Yooz Jiliržtajapapanž kamča. Nižaza ticzcan Yooz Jiliržtajapapanž ticža. Jalla nižtiquiztan žejtcanami ticzcanami Yooz Jiliržtajapapančhumča. ⁹Jalla nijapa Jesucristuqui ticziča, nižaza jacatatchiča, žejtñi žoñžtami, ticzi žoñžtami tjapa žoñinacžta Jiliri cjisjapa.

¹⁰Jalla nižtiquiztan čkjažtiquiztan am criichi jilžquiz uj tjojtunjo? Nižaza čkjažtiquiztan am jilž quintra iñarjo? Tjapa učhumqui Yooz yujcquiz prisintistanča, niiž pjalžtaž cjisjapa.

¹¹Cjijrta Yooz takuqui tuž cjiča:

“Yoozqui ultimupanž cjiča,
‘Wejt yujcquiz zapa mayni žoñiqui quillznaquičha. Nižaza zapa mayniqui wejtquin rispitaquičha; nižaza wejt honora chiyaquičha’ ”.

¹²Jalla nižtiquiztan tjapa učhumqui Yoozqui quinta tjaastanča.

UJQUIZ ANA TJOJTSTKATA

¹³Jalla nižtiquiztan učhumqui porapat ana iya ujnaca tjojtনারস

waquiziĉha. Pero tjapa uĉhumqui tuž tantiiz waquiziĉha, yekja jilžquiz anapanž ujquiz tjojtskatz munzqui.¹⁴ Ĉjul cusasami tsjii criichi žoňžquiz ana ujchiz cjiskatasaćha. Jalla nii razuna zizuĉha, Jesucristo Jiliržquiz kuzziz cjen. Jalla niic nužupanĉha. Jakziltat “Tii cusasaqui ujchiz cjiskatĉha” cjican tantiyaĉhaja, jalla niizquiz nii cusasaqui ujchiz cjiskatasaćha.¹⁵ Anĉuca lujltiquiztan tsjii criichi žoňž kuz payznaquiz niiquei, nii ĉjeriqui anaž lujlz waquiziĉha. Jalla nii ĉjeri tira lulaquiz niiquei, amqui nii payznakskatni žoňžtan ana zuma munaziĉha. Yekja criichi žoňžquiz ana ujquiz tjojtskata, castica cjeyajo. Jesucristuqui niiztajapa zakaz ticziĉha.¹⁶ Tsjii žoňžtaqui ĉjulu lujlmi walikaz cjesaćha. Pero nii lujltaž cjen parti žoňinacaqui, “Ana zuma kamaňchizza nii criichi žoňiqui” cjeĉhaj niiquei, nekztan ana lujlz waquiziĉha.¹⁷ Yooz mantuquiz kamcan, ĉjerimi liczmi ana importiĉha. Pero Espiritu Santuž cjen ana ujchiz cjee; nižaza Yooztan anĉucatan walikaz cjee; nižaza cuntintuž kuzziz cjee. Jalla nužuĉha chekan zuma kamaňaquí.¹⁸ Jakziltat jalla nuž kamcan Cristužquiz sirwaĉhaja, jalla niiz cjen Yoozqui cuntintuž cjequićha. Nižaza parti žoňinacaqui “Nii žoňiqui walikaz kamĉha” cjican chiyaquićha.

¹⁹ Uĉhumnacžtan parti žoňinacžtan zumapanž kamzjapa kuz tjaa. Nižaza parti criichinacžquiz jue'ant zuma kamaňchiz cjeyajo, jalla nii kamzquiz kuz tjaa.²⁰ Anĉucaž ĉjulumi lujltiquiztan anaĉha yekja criichi žoňžquiz Yooz zuma kamaňquiztan jaytiskatzqui. Ana ĉjul ĉjerimi ujchiz cjiskatasaćha. Pero nuž ĉjulumi lujlžcu yekja criichi žoňžquiz ujquiz tjojtskataquiz niiquei, jalla nižtiquiztan

anaž ĉjulumi lujlz waquiziĉha.²¹ Tsjii criichi žoňiqui anĉucaž ĉjizwi lujltiquiztan, nižaza vinu lictiquiztan, nižaza ĉjulumi paatiquiztan ujquiz tjojtskatasaż niiquei, jalla nižtanaca paazqui ana waquiziĉha.²² Jesucristužquiz tjapa kuzziz cjen ĉjulu kamaňchizlaja, jalla nii kamaň jaru Yooz yujquiz kamz waquiziĉha. Yoozquizkaz quinta tjaastanĉha. Jalla nuž zuma kamcan persun kuzquiz uj ana sint'aquićha. Persun kuzquiz ana zinta uj sint'ican zuma kamaquiz niiquei cuntintuž cjequićha.²³ Pero jakziltat paysnakni kuztan lujlĉhaja, jalla nii paysnakžcu lujltiquiztan persun kuzquiz uj sint'aquićha, “Ujžcaa nii lujlžqui” cjican. Yoozquin ana tjapa kuztanžlaj niiquei, ĉjulumi ujž cjesaćha. Yoozquin kuzzizpan cjee.

PORAPAT YANAPARASAUQIĉHA

15 ¹ Yekjap uĉhumqui tjapa kuztanpan Yoozquinĉha. Yekjapanacaqui Yooztan kamcan llajlla kuzzizza. Uĉhum kuzquiz pecta jarukaz anaž kamz waquiziĉha. Nii llajlla kuzziz criichi žoňinacž pinsitanaca panž cjužzna, zuma kami yanapajo.² Zapa mayni criichi žoňiqui parti criichi žoňinacžtajapa kamz waquiziĉha, ninaca tsjan zuma kamaňchiz cjisjapa.³ Jesucristuqui nižta kamĉiĉha, anaĉha persun kuz wali cjisjapa kamchiqui. Cjijrta Yooz takuqui Jesucristuž puntuquiztan tuž cjiĉha: “Yooz quintrā iňarňi žoňinacaqui wejt quintrā iňarchiĉha”.⁴ Yooz takuqui uĉhumnacalta cjijrtkalĉha, uĉhumnacaquiz tjaajinzjapa. Jalla tuž uĉhumnacaquiz tjaajinĉha, zuma tjurt'iňi kuztan, pasinsis kuztan, nižaza p'ekinchayta kuztan, Yoozquin arajpachquin ojksz tjewzjapa.⁵ Yoozqui uĉhumnacžtan

pasinsis kuzzizza; nižaza ućhumnacaquiz p'ekinchayčha. Nii Yoozpacha ućhumnacaquiz yanapt'ila, tsjii kuzziz cjeja, nižaza zuma kamajo Jesucristuž munañpacama. ⁶Jalla nuž tsjii kuzziz kamcan, ućhumqui tsjii kuzziz Yooz honora waytaquičha. Yoozqui ućhum Jesucristo Jilirž Ejpčha. Jalla niž honora waytaquičha.

CRISTUŽ PUNTU

⁷Jalla nižtiquiztan tsjiimi tsjiimi zumaž risiwčcu munazaquičha, jaknužt Cristuqui ućhumnacatan zuma munazičhaja, jalla nuž, Yooz honora waytita cjisjapa. ⁸Anćhucaquiz cjiwčha. Jesucristuqui judío žoñinaca liwrii nižaza yanapñi tjonchičha. Nuž tjontiquiztan Yooz niž taku lijituma cumpliñipan, jalla nii tjezičha. Yoozqui tuquitpanpacha judío žoñinacž atchi ejpnacžquiz taku tjaachičha. Jalla nii taku cumpličha, Jesucristuž tjonchiž cjen. ⁹Nižaza Jesucristuqui tjonchičha, yekja wajtchiz žoñinacžquiz Yooz honora waytiskatzjapa. Yooz ancha okñi kuzziz cjen niž honora waytitačha. Jalla nužupan cjiirta Yooz takuqui chiičha, tuž cjian:

“Jalla nižtiquiztan wejrqui yekja nacionchiz žoñinacžtan žejlcan, am honora waytačha. Nižaza am honora waytican, itsnačha”.

¹⁰Yooz tawk liwruquiz tuž cjiirtazakazza:

“Yekja nacionchiz žoñinaca, Yooz parti žoñinacžtan chica cuntintuž cjee”.

¹¹Yooz tawk liwruquiz tuž cjiirtazakazza:

“Yekja nacionchiz žoñinaca, tjapa anćhucqui Yooz Jilirž honora wayta. Tjapa žoñinacaqui Yooz

zuma paatanacquiztan nižquin honora tjaala”.

¹²Nižaza Yooz tawk liwruquiz Isaiasqui tuž cjiirchičha:

“Isaž majchmaatinacquiztan tsjiiqui tjonaquičha. Jalla nii tjonžcu yekja nacionchiz žoñinacaž mantaquičha. Nižaza niž cjen ninacaqui liwriiñiž tjewznaquičha”.

¹³Yoozza liwriiñi tjewzkatñiqui. Nii Yoozqui anćhuca kuz ancha cuntintu cjskatla. Nižaza Jesucristužquiz kuzziz cjen walikaz cjskatla. Nekztan anćhucqui Yooz Espiritu Santuž aztan zumpacha liwriiñiž ancha tjewznasačha.

¹⁴Wejt jilanaca, cullaquinaca, anćhucqui ancha zuma kamañchizza, nižaza Yooz puntu zuma zizza, nižaza tsjiižquizimi tsjiižquizimi Yooz puntu zuma intintiskatčha. Jalla nužupančha anćhuca kuzqui. Jalla niiqui zumpachal zizučha. ¹⁵Jalla nuž cjenami ana jiwjatžcu tsjii kjaž puntunaca cjiiržcučha, anćhucaquiz cjuñkatzjapa. Yoozqui wejtquiz fatora paacan apóstol puestuquiz utchičha, tii puestuquiz Jesucristo sirwizjapa. Jalla nižtiquiztan anćhucaquiz cjiiržcučha.

¹⁶Jesucristo sirwican, yekja wajtchiz žoñinacžquiz liwriiñi Yooz taku paljayučha. Jalla nuž Yooztajapa langznučha, nii yekja wajtchiz žoñinaca Yoozquin kuz tjaajo. Ninaca tsjii zuma ofrendažtakaz Yoozquiz prisintis pecučha. Nižaza Espiritu Santuž ninacžquiz zuma kamañchiz cjskatchiž cjen, Yoozqui ninacžquiztan cuntintuž cjequičha.

¹⁷Jesucristo sirwican wejt Yooztajapa langžtiquiztan cuntintučha wejrqui, tama žoñinaca nižquin kuz tjaachiž cjen. ¹⁸Jesucristuž puntuquiztankaz wejrqui chiiz pecučha. Jesucristuqui

wejtquiz wacchi zuma obranaca paakatchiċha, yekja wajtchiz žoñinaca nižquin kuz tjaakatzjapa. Jesucristuž cjen, wejrqui milajru paatanacami Yooz puntu chiitanacami nii yekja wajtchiz žoñinaca Yooz kuzcama cazkatchinċha. ¹⁹ Espiritu Santuž aztan ninaca cazkatchinċha wacchi milajrunaca paacan. Jalla nuž paacan, nižaza tjapa Jesucristuž puntuquiztan parlican, wejrqui tjapa kjutni ojklaychinċha, Jerusalenquiztan Ilirico yokaran. ²⁰ Wejrqui kuzquiz tantiichinċha, jakziquin Yooz puntu parlitažlaja, jalla nicju ana ojcz pecchinċha. Pero jakziquin Jesucristuž puntu ana parlitažlaja, jalla nicjuñ liwriiñ Jesucristuž puntuquiztan parlican ojklayaċha, yekja žoñž iclizanaca ana mitiscu. ²¹ Cjijrta Yooz takuqui tuž cjiċha:

“Tuquiqui Yooz puntu ana nonziċha.
Jaziqui nii žoñinacaqui Yooz
puntu nonžcu catokaquiċha.
Nižaza ninacaqui Yooz puntu
intintazaquiċha”.

PABLUQUI ROMA CJITA WAJTQUIN OJKZ PECĊHA

²² Jalla nuž ojklaycan wejrqui anċhucaquiz ana tjonznii atchinċha. Walja tjonz pecaytuċha, pero anal atchinċha. ²³ Ažk watanacquiztanpacha wejrqui anċhucatan zalz pecaytuċha. Anziqiu tii yokaran ojklazqui žerzinċha. ²⁴ Jalla nižtiquiztan anċhucaquin ojcz cjisnuċha; España ojkan tjonznäċha. Tsji kjaž maj anċhucatan cuntintu kaman, anċhucqui wejr yanapasaċha, wilta jiczquiz ojczjapa España irantajo. ²⁵ Pero anzpacha wejrqui Jerusälén watja okaċha, ofrendanaca chjichaċha nicju žejlñi criichinaca yanapzjapa.

²⁶ Macedonia wajtchiz žoñinacami Acaya wajtchiz žoñinacami kazziċha ofrendanaca utzjapa, Jerusälén pori criichinacžquiz yanapzjapa. ²⁷ Jalla nuž ofrendanaca tjaaz puntuquiztan ninacapachaċha “Waliċha niiqui” cjichiqui. Nižaza ninacaqui judío žoñinacžquiz kajažtakazza. Judío žoñinacaqui ninacžquiz Yooz zuma tjaajintanaca tojunchiċha, ninaca liwriita cjisjapa. Jalla nižtiquiztan nii yekja wajtchiz žoñinacaqui judío wajtchiz žoñinacžquiz ninacž cusasanaca tojunz waquiziċha.

²⁸ Primiraqui tii ojcz cumplistanċha ofrendanaca intirjizjapa. Jalla nuž ojkažu anċhucaquiz tjonznäċha, España ojkan. ²⁹ Nekztan liwriiñ Jesucristuž puntuquiztan zumpacha anċhucatan parliz pecuċha. Jalla nekztanaqui Jesucristuž cjen wejtquizimi anċhucaquizimi wali cjequiċha. Nužupanž cjequiċha.

³⁰ Jilanaca, cullaquinaca, anċhucaquiz rocuċha učhum Jesucristo Jiliriz cjen, nižaza munaziñi kuz cjiskatñi Espiritu Santuž cjen, oracionžtan yanapalla. Wejrqui ancha Yoozquiztan mayuċha, ³¹ Judea wajtchiz quinträ žoñinacžquiztan anapan tanta cjisjapa. Nižaza oracionžtan yanapalla, tii weriž chjitžta ofrendanaca wali risiwtä cjisjapa. Pecuċha, judío criichi žoñinacaqui tii ofrendanaca zuma risiwċhaja, nii. ³² Jalla nuž zuma wataquiz niiqui, anċhucaquin tjonžcaċha Yooz munan. Wejr cuntintu irantižquizjapa, mayižinaquiċha. Nižaza anċhucatan tjonžcu porapat cuntintu kuzziz yanaparasjapa mayižinaquiċha. Jalla nijjapa oracionžtan yanapalla. ³³ Yoozqui anċhuc walikaj cjiskatla. Jalla nužoj cjila. Amén.

PABLUŽ TSAANTANACA

16 ¹Tsaa criichi cullaquiqui
 žejlča, Febe cjeti, jalla naa
 cullaquiqui ancha zumča cjiwča.
 Naaqui Cencia iclizquiz Yooztajapa
 sirwiča. ²Yooz Jiliriz cjen naa
 cullaqui zuma risiwaquiča. Jalla nuž
 waquiziča Jesucristužquiz kuzziz
 jilanacaqui. Jalla naa cullacaquiz
 yanapaquiča čhulu pecanami.
 Naaqui wacchi criichi žoñinacžquiz
 yanapchinča, nižaza wejtquizimi.
³Priscilaquizimi Aquilžquizimi
 tsaanzinalla. Ninacaqui
 Jesucristužquin sirwiñi mazinacača.
⁴Wejr ticznawc cjen ninacaqui
 wejr liwriiskatchiča. Jalla
 nuž liwriiskatcan ninacaqui joz
 ticzizakazza. Jalla nižtiquiztan ninacaž
 cjen Yoozquin gracias cjican chiyuča.
 Nižaza tjapa nacjuñta jilanacaqui
 ninacaž cjen Yoozquin gracias cjiča.
⁵Nižaza Priscila Aquilž kjuyquiz ajczñi
 jilanacžquiz tsaanzinaquiča. Nižaza
 weriž pecta Epeneto tsaanzinaquiča.
 Acaya wajtchiz žoñinacžquiztan
 primirpacha niiqui Cristužquin
 kuz tjaachiča. ⁶Nižaza Mariaquiz
 tsaanzinaquiča. Naaqui ančhucatan
 žejlcan ancha langzinča. ⁷Nižaza
 wejt wajtchiz žoñinacžquiz, Andrónico,
 nižaza Junias, tsaanzinaquiča.
 Ninacaqui wejttan chica carsilquiz
 žejlchi compañerunacatača.
 Apostolunacazakaz ninaca rispitcha.
 Weriz ima Jesucristužquiz kuz
 tjaan, ninacaqui Jesucristužquiz kuz
 tjaachiča.

⁸Nižaza Ampliasquiz
 tsaanzinaquiča. Jalla niiča weriž
 pecta maziui. Niiqui Jesucristo
 Jiliržquin kuz tjaachizakazza. ⁹Nižaza
 Urbanžquiz tsaanzinaquiča. Niiqui
 Jesucristužquiz sirwiñi maziča.

Nižaza weriž pecta Estaquizquiz
 tsaanzinaquiča. ¹⁰Nižaza Apelesquiz
 tsaanzinaquiča. Jalla niiqui
 Jesucristužquiz kuz tjaažcu, Yooz
 kamaña pankaz kamča. Nižaza
 Aristóbuluž kjuychiz žoñinacžquiz
 tsaanzinaquiča. ¹¹Wejt wajtchiz
 žoñžquiz, Herodión, tsaanzinaquiča.
 Nižaza Narcisož kjuychiz Yoozquin
 criichi žoñinacžquiz tsaanzinaquiča.
¹²Nižaza Trifenaquiz, nižaza
 Trifosaquiz tsaanzinaquiča.
 Ninacaqui Yooz Jiliržtajapa sirwiča.
 Nižaza učhum pecta Persidaquiz
 tsaanzinaquiča. Naaqui Jesucristo
 Jiliržtajapa juc'anti langzinča.
¹³Nižaza Rufžquiz tsaanzinaquiča.
 Niiqui Jesucristužquiz tjapa kuz
 tjaažcu, parti hermanonacžquiz
 rispitta cjissiča. Nižaza niiž maaquiz
 tsaanzinaquiča. Naaqui wejt maa
 cuntitača. ¹⁴Nižaza tsaanzinaquiča
 tinacžquiz, Asincritužquiz,
 Flegontižquiz, Hermasquiz,
 Patrobasquiz, Hermesquiz, nižaza
 ninacžtan chica kamñi jilanacžquiz.
¹⁵Nižaza tsaanzinaquiča
 Filologužquiz, nižaza Juliaquiz, nižaza
 Nereožquiz, nižaza niiž cullacaquiz,
 nižaza Olimpazquiz, nižaza tjapa
 ninacžtan kamñi criichi žoñinacžquiz.
¹⁶Nižaza porapat zuma
 tsaanassaquiča, tjapa kuztan. Nižaza
 tjapa Jesucristužquiz kuz tjaañi
 žoñinacaqui ančhucaquiz tsaanz
 apayžquiča.
¹⁷Jilanaca, cullaquinaca,
 ančhucaquiz rocuča, zumapanž
 ančhucui cwitzazuquiča, nii
 t'akt'aksñi žoñinacžquiztan. Nižaza
 zumpacha cwitzazuquiča tsjii
 kjutñi tjaajini žoñinacžquiztan. Nii
 žoñinacaqui, jaknužt ančhucaquiz
 Yooz puntu tjaajinta cječhaja, jalla
 nii tjaajinta quintr tjaajinča.

Ninacžquiztan ančhucqui zaraka.

¹⁸Ninacqui Jesucristužtajapa ultimun sirwiča. Antiz ninacqui persun kuzcamaž sirwiča. Ninacqui humilde criichinacžquiz incallča, zuma chiican, žoñinacž kuz wali cjisjapa.

¹⁹Tjapa žoñinacqui ančuca puntu zizza, jaknužt ančhucqui Yoozquin cazzaja, jalla nii. Jalla nižtiquiztan wejrqui chipznuča. Nižaza zumanaca paazjapa zizñi zizñi cjee. Ana zumanaca paachucaž cjen, ana mitisa.

²⁰Jalla nuž zuma kaman, Yoozqui ančhucaltajapa Satanás diabluzquiz tječžu, atipaquiča. Yooza ančhuc walikaz cjiskatñi. Nižaza učum Jesucristo Jiliriqui ančucaquiz yanapt'ila. Amén.

²¹Timoteuqui ančucaquin tsaanz apayžquiča. Niiqui wejt compañeruča, wejr Yooztajapa langznan. Nižaza wejt wajtchiz žoñinaca, Lucio, Jasón, Sosípater, jalla ninacqui ančucaquin tsaanz zakaz apayžquiča.

²²Nižaza wejrqui, Tercio cjita žoñtča ančucaquin tsaanz zakaz apayžcuča, Jesucristo Jilirž tjuuquiz. Wejrqui Pabluž chiitiquiztan tii cartal cijjruča.

²³Nižaza Gayuqui ančucaquin tsaanz apayžquiča. Niiž kjuyquiz

alujassinča. Nižaza niiqui čjul criichi žoñimi kjawznipanikazza, niiž kjuyquiz alujazjapa. Nižaza Erastuqui ančucaquin tsaanz apayžquiča. Jalla niiča wajt paaz tanzñi tesoreruqui. Nižaza učum jila Cuarto cjitaqui ančucaquin zakaz tsaanz apayžquiča.

²⁴Učum Jesucristo Jiliriqui tjapa ančucaquiz zumaj yanapt'ila. Jalla nužoj cjila. Amén.

ŽERZ TAKUNACA

²⁵Ima žerzcan Yooz honora waytuča. Yoozqui ančhuc tjurt'iñi kuzziz cjisnasača. Nii liwriñi Yooz puntumi, Jesucristuž puntumi parluča. Jalla nii parlita puntunacqui Yoozqui ančucaquiz zizkatchiča. Tuquitan nii puntunaca ana ziztača. ²⁶Tii timpuquizkaz Yoozqui nii puntunaca zizkatchiča. Nižaza profetanacqui nii puntunaca cijjrchiča Yooz tawk liwruquiz. Tii timpuquiz wiñay žejtñi Yoozqui mantichiča, tjapa žoñinacžquiz nii puntunaca zizajo. Jalla nuž mantichiča, žoñinaca Jesucristužquiz kuz tjajo, nižaza casajo.

²⁷Yoozkazza zizñi zizñiqui. Jesucristuž cjen Yooz honoraqui wiñaya waytitaj cjila. Jalla nužoj cjila. Amén.